



PERCUMA
KDN PP11732/12/2012 (032229)

UNTUK AHLI SAHAJA

JANUARI 2017

KEMAS KINI HARIAN UNTUK ANDA: BERITA, RENCANA, WAWANCARA, ANALISIS POLITIK SEMASA

www.roketkini.com

DITUBUHKAN PADA 1966
DI KUALA LUMPUR

Rocket

facebook.com/roketkini twitter.com/roketkini roketkini@gmail.com

www.dapmalaysia.org

**Wawancara Ahmad Ton:
Tokoh veteran DAP** > muka 14



PENSEJAJARAN KUASA POLITIK DEMI MALAYSIA BARU

> muka 4 & 5



NOTA EDITOR

EGO UMNO YANG TERAKHIR

Oleh MAHDZIR IBRAHIM

Akhirnya 2016 melabuhkan tirai. Bagai sebuah pementasan teater yang tragis, panggung pun bergelap dan penonton semua berhamburan lari tergesa-gesa mahu bergerak ke pementasan seterusnya. Biarlah tidak ada langsung ingatan yang tersisa dari tahun penuh kegilaan ini.

Politik Malaysia, sebagai bahagian kecil daripada politik dunia yang betul-betul menggilai tahun ini, memang telah buat kita semua menyampaah secara berjemaah. Politik, secara umum pun sudah memang menjadi benda yang meloyakan. Tidak hairan ramai yang berusaha meminggir darinya.

Lihat sahaja bagaimana Amerika Syarikat, sebagai contoh paling mudah dan popular, telah menjadi mangsa politik yang menyudut mereka sehingga terpaksa memilih antara dua calon paling tidak memberhikan, sepanjang sejarah kuasa utama hemisfera Barat terbabit. Di satu pihak, ia berhadapan kegilaan makhluk berwarna jingga yang menjanjikan keagungan buat bangsanya, sambil membakulsampah demikian banyak etnik berlainan warna kulit, agama dan nilai moral.

Satu-satunya pilihan selain makhluk jingga dengan jemari kontot itu pula ialah isteri bekas presiden yang terpalit begitu banyak skandal, namun cuba disumbat juga ke tenggorok rakyat Amerika sebagai calon emas, hanya kerana beliau seorang wanita. Akhirnya Clinton sekadar menjadi alas kaki Donald Trump, yang bakal mengangkat sumpah tidak lama lagi. Tragedi ini pun sudah cukup sebenarnya, sebagai batu tanda menggambarkan betapa melingkupnya politik di serata ceruk dalam tahun 2016.

Politik telah memisah-misahkan kita sebagai bangsa manusia, menjadi autonom-autonom kecil dengan pendapat dan nilai yang harus mahu dipertahankan, biar di ruang apa sekali pun. Baik melalui debat-debat di media sosial, ataupun di dewan-dewan parlimen; kita melihat bagaimana kumpulan-kumpulan yang saling bertelagah membentuk kawanan masing-masing, dan terus bergulat cuba memujuk sokongan ramai, agar mereka terus berkuasa, atau sebaliknya mengambil alih kuasa.

Di Malaysia, halnya sedikit berbeza daripada umumnya pergulatan politik dunia. Pergulatan politik Malaysia adalah sebuah pergulatan melawan 'rejim' yang sudah berkuasa selama 60 tahun.

Negara sedang berhadapan konflik keyakinan terhadap kepimpinan kerajaan, dan pada masa yang sama belum lagi bersedia untuk menerima gabungan kepimpinan pembangkang untuk mengambil alih tampuk pentadbiran di Putrajaya.

Perdana Menteri sedang berkira-kira untuk menyelamatkan diri, dengan mengadakan pilihan raya seawal suku pertama 2017. Qaul yang lain menjangkakan Datuk Seri Najib Razak akan membubarkan parlimen sebaik sahaja selesai Sukan Sea yang kebetulan berkongsi tarikh dengan ulang tahun Hari Merdeka ke-60. Ketika itu, Setiausaha Agung DAP, Lim Guan Eng pun dijangka sudah tidak lagi boleh bertanding.

Gelap dan kelam kisah politik negara nampaknya belum selesai, dan akan berlanjut terus sehingga debu-debu pilihanraya umum ke-14 akhirnya menghilang. Namun kita harus percaya bahawa, tidak seperti Amerika; kita mempunyai alternatif yang lebih baik. Dengan garis politik yang kian jelas antara para demokrat dan gerombolan kleptokrat, percayalah bahawa langit paling gelap adalah sebelum fajar menjelma.

Selamat tahun baru. Dirgahayu Malaysia Baru.

Secara logik matematik, UMNO BN masih kekal memerintah adalah kerana hasil dari sumbangan besar kerusi BN di Sabah dan Sarawak.

Ini jawapan matematik yang semua orang tahu. Formula matematik ini juga dikira hampir mustahil untuk dilakukan apatah lagi dengan mengambil kira senario politik pembangkang ketika ini.

Maka logik matematik ini masih meletakkan pembangkang di tempat yang sama seperti sebelumnya.

Mungkin ada teori lain yang boleh menjadi faktor pembolehubah atas logik matematik tersebut. Teorinya barangkali harus merujuk kepada naratif politik itu sendiri.

Kekuatan UMNO pada ketika ini adalah terletak pada ego dan hegemoninya, bukan semata-mata pada kekuatan sumber dana dan sumbangan BN di kerusi Sabah dan Sarawak.

Ego ini mewujudkan hegemoni UMNO, ia mencipta imaginasi dan mitos hingga komponen BN di Sabah dan Sarawak cukup takut, begitu juga dengan MCA, MIC dan Gerakan juga takut dan tunduk atas kemahuan UMNO. Begitu jugalah dengan rakyat, malahan segelintir pemimpin pembangkang.

Selama ini, ego dan hegemoni UMNO inilah yang membina politik perkauman dan sentimen keagamaan. Ugutan dan tekanan kepada semua pihak bermula dari ego UMNO ini. Ianya tampak tidak berkesudahan.

Dari mana ego dan hegemoni UMNO ini muncul?

Seperti yang saya katakan tadi, kita harus kembali kepada naratif sejarah politik UMNO itu sendiri.

Sejarah politik UMNO bermula di Johor. UMNO di Johor sebelum 2013 tidak pernah terjejas sedikit pun dengan pengaruh pembangkang.

Di sinilah sejarah ego UMNO muncul dan bertapak, bukan di negeri-negeri pantai timur atau Malaysia Timur hatta Utara. Dalam kempen pilihan raya 2013 lagi, slogan Johor adalah Tiang Seri UMNO menjadi azimat kempennya, semua orang percaya.

Wakil UMNO Johor, Datuk Ayub Rahmat yang juga EXCO kerajaan negeri telah berucap dalam sesi Persidangan Agong UMNO (PAU17) dengan terang memberi isyarat dalam beberapa ungkapannya.

Beliau mengatakan bahawa parti itulah yang sepatutnya



Kekuatan UMNO pada ketika ini adalah terletak pada ego dan hegemoninya, bukan semata-mata pada kekuatan sumber dana dan sumbangan BN di kerusi Sabah dan Sarawak.

berterima kasih kepada orang Melayu. Bukan orang Melayu yang terhutang budi dengan UMNO. UMNO yang terhutang budi dengan orang Melayu.

Ayub mengingatkan kepimpinan parti itu agar jangan sese kali lupa siapa di sebalik kejayaan UMNO hari ini.

Ini adalah isyarat penting UMNO Johor kepada pemimpin elitnya. Ia membuktikan bahawa ego UMNO ini wujud dari naratif sejarah penubuhan dan kekuatan UMNO di Johor.

Malah, jika dilihat dengan hati-hati, UMNO Johor ini lebih licik dan kemas kerjanya berbanding UMNO di negeri-negeri lain. Kekuatan ini bersandarkan sejarah dan tradisi yang kuat. Bukan sekadar slogan semata-mata.

Justeru, jika ego ini dapat digugat, pastinya UMNO akan bergoncang kuat. Ia boleh menjadi sebab berakhirnya ego dan hegemoni UMNO yang mencengkam rakyat dan komponen BN.

Dengan kata lain, pembangkang

mesti menang besar di Johor, ini boleh menjadi 'pembolehubah' yang berkesan.

Kemenangan pembangkang di Johor akan menandakan berakhirnya legasi kubu kuat UMNO. Kita harus sedar bahawa kemenangan ke atas ego UMNO ini adalah kemenangan moral yang cukup besar dan ia akan memberi nilai yang cukup signifikan ke atas lanskap politik negara.

Dengan berkuburnya ego UMNO di Johor, maka kita akan dapat lihat kesan teori domino. Kesan domino ini akan melenyapkan hegemoni dan mitos UMNO ke atas rakyat, parti di Sabah dan Sarawak termasuk rakan komponennya.

Tanpa Selangor, Pulau Pinang dan Johor, UMNO ibarat sudah tiada kaki dan tangan, hanya tinggal badan yang pastinya sukar untuk mereka bergerak lagi.

Ketika ini, parti-parti di Sabah dan Sarawak tidak lagi memerlukan UMNO kerana tidak ada apa lagi yang ingin dibimbangkan kerana ego dan hegemoni UMNO sudah tiada lagi.

Pada fasa inilah rundingan antara pakatan pembangkang di Semenanjung dengan parti-parti di Sabah dan Sarawak dapat dijalankan untuk melicinkan peralihan kerajaan pusat.

Tanpa kemenangan pembangkang di Johor, ego dan hegemoni UMNO akan terus hidup, ego dan hegemoni ini akan terus mencengkam rakyat dan parti-parti di Sabah dan Sarawak.

Justeru, usaha menewaskan ego UMNO yang terakhir, perlu dijalankan. Kerajaan UMNO di Johor ketika ini sedang tersepit, mereka gagal menawarkan pilihan yang lebih baik kepada rakyat. Inilah masanya rakyat bangkit.

***Mahdzir Ibrahim adalah Pengarah Pendidikan Politik DAP Johor**

TANPA UMNO, ORANG MELAYU TIDAK MATI

Oleh DATUK MOHD ARIFF SABRI

Kita sudah dengar kenyataan-kenyataan bebal dari PWTC. Inilah hari-harinya di mana sebahagian orang Melayu memuliakan kebebasan, pembohongan dan keangkuhan. Tidak pernah terjadi dalam sejarah bangsa Melayu, sebahagian Melayu memuliakan pencuri, pembohong dan orang yang zalim. Tapi ianya berlaku di zaman Najib Razak.

Mungkin suatu masa keadaan ini boleh terjadi – satu hari gerombolan UMNO memasuki rumah kita, mencabul isteri dan anak-anak kita, kita akan kata- tidak mengapa kerana si pencabul sebangsa dan seagama dengan kita. Lagipun, tidak ada empat saksi yang melihat perbuatan cabul tersebut. Bahkan, ada yang mungkin kata itu semua perancangan Allah, sama seperti Allah memilih Najib jadi pemimpin sebahagian Melayu!

Mereka yang berkata demikian adalah penjenayah dan pembelot sebenar kepada kaum Melayu. Ada 3,000 jenis mereka telah bersidang di PWTC saat ini.

Kebebasan dan kebodohan datang dari pelbagai lapisan pemimpin UMNO yang sedang bersidang. Dari jurucakap mereka yang tidak ada kapasiti berfikir. Jurucakap mereka yang menyebelahi pencuri dan gerombolan pencuri. Itulah kebenaran yang kita pegang? Itu sahaja yang kita perlu tahu?

Lain-lain cerita tok nenek yang UMNO jaja, kononnya orang Melayu akan hancur jika UMNO hancur, DAP akan memerintah negara, Mahathir pembelot bangsa, itu semua yang patut keluar melalui lubang bawah tapi dikeluarkan melalui lubang atas.

Pemimpin UMNO mahu jadikan Melayu pengecut

Cuba bayangkan jika seluruh rakyat Malaysia ialah orang Melayu, tiba-tiba ada kumpulan yang menentang kemungkaran. Label apa yang akan kita sebut kepada mereka? Adakah kita akan kata inilah golongan yang akan menghancurkan institusi penjaga kepentingan Melayu, inilah golongan yang akan memusnahkan Islam? Entah jenis apa pandangan xenofobik yang kita sedang dengar ini?

Jelas, pemimpin UMNO mahu jadikan Melayu bangsa pengecut yang takutkan DAP sedangkan DAP hanya ada 37 Ahli Parlimen, malah terdiri dari pelbagai suku bangsa. Adakah pemimpin UMNO mahu takutkan Melayu dengan kaum Cina yang berjumlah 24 peratus dan menjelang 2030 akan hanya tinggal 15 peratus?

Adakah pemimpin UMNO mahu takutkan Melayu dengan kaum Cina yang berjumlah 24 peratus dan menjelang 2030 akan hanya tinggal 15 peratus?

Inikah keberanian pahlawan keturunan Bugis? Yang cakap besar bila bahtera berkemudi, sauh diangkat, gendang perang ditabuh-tabuhkan, pantang pendekar berpaling pulang?

Hei- kita juga anak jantan, tidurnya di puncak gelombang, matinya di tengah gelanggang, yang tidak kenal air mata, yang tidak kenal tunduk kula!

Apa yang kita harap yang membangun dari himpunan orang pencari keseronokan malam dan hanya bercakap kosong? Apa perkara besar yang kita harap dari orang yang condong kepada



Jelas, pemimpin UMNO mahu jadikan Melayu bangsa pengecut yang takutkan DAP sedangkan DAP hanya ada 37 Ahli Parlimen, malah terdiri dari pelbagai suku bangsa. Adakah pemimpin UMNO mahu takutkan Melayu dengan kaum Cina yang berjumlah 24 peratus dan menjelang 2030 akan hanya tinggal 15 peratus?

bercandu dan bermadat?

Apa perkara besar yang kita harap dari sebahagian Melayu yang bergantung kepada pemberian sedekah dari pemimpin mereka? Apa yang diharap kepada sebahagian bangsa kita yang tidak akan mengerti bahawa hak ialah hasil usaha kudrat sendiri, bukan sesuatu yang diperolehi oleh gubalan undang-undang?

Kita tidak boleh bergantung harap kepada UMNO. Kita yang bergelar Melayu.

Jurucakap UMNO memihak kepada penzalim, pencuri, perasuah. Mereka adalah musuh bangsa Melayu dan bangsa Malaysia.

UMNO 'guna' Allah untuk kepentingan politik?

Kalau kita dengar ucapan pemimpin UMNO, maka kita rasakan Allah pun ahli UMNO. Sebab itu pemimpin mereka kata, Allah memilih Najib Razak. Tuhan mana yang pilih orang seperti Najib? Ianya mesti Tuhan yang tidak baik kerana memilih orang yang tidak baik. Ianya pasti bukan Allah.

Sejak bila orang UMNO berwatak agama dan tidak berhenti menyelit

Allah dalam ucapan mereka? Siapa sebenarnya yang menggunakan Islam?

Yang mengancam Islam ialah puak fasis Islam. Yang mengancam Islam ialah sebilangan pemimpin UMNO yang munafik. Yang mengancam Islam ialah kebebasan dan kebahlulan mereka yang menjaga institusi Islam. Dan sekarang mereka hendak kuasa lebih dan mahukan hukuman yang lebih berat?

Kalau ikut logik UMNO, tentulah Allah juga yang memilih Azmin, Guan Eng dan Ustaz Mohd Yaacob. Jika kita mesti taat kepada Najib, maka kita juga mesti taat kepada Menteri Besar dan Ketua Menteri yang lain.

Allah bukan ahli UMNO. Dan Allah juga tidak hanya mendengar doa orang UMNO. Dia juga maha mendengar doa orang-orang yang tertindas dan dianiani.

Perwakilan pencari keseronokan malam ini, menganugerahkan kepada diri mereka, hak untuk bercakap bagi pihak bangsa Melayu, bagi pihak agama Islam, bagi pihak negara. Kita tidak mahu lagi bangsa Melayu diwakili oleh pleasure seekers dan mereka yang menyamun harta benda rakyat atas nama bangsa, agama dan negara.

Bangsa Melayu bukan pencuri,

Islam bukan agama yang menyokong kemungkaran dan salah laku. Negara ini bukan negara penyamun, oleh penyamun dan untuk penyamun!

Dari Najib sampai kepada pemimpin picisan UMNO- berhentilah berbohong, atau kita akan menceritakan yang benar-benar mengenai kamu.

Melayu tidak akan mati kalau UMNO mati. Ada 18 juta orang Melayu dalam negara kita sekarang. Ahli UMNO ada 3 juta. Ertinya, hanya 1 dari 6 orang Melayu ialah UMNO. Jika seorang ahli UMNO itu mati, ada lima orang Melayu yang akan terus hidup tanpa orang UMNO.

Jika UMNO tidak memerintah negeri, orang Melayu tidak mati bergelimpangan. Kiamat tidak mendatangi orang Melayu. Langit tidak runtuh. UMNO tidak perintah Selangor – tidak ada orang Melayu yang mati bergelimpangan. UMNO tidak perintah Pulau Pinang – orang Melayu makmur dan kehidupan dibaiki lebih selesa dari yang UMNO dan BN lakukan. Tidak ada orang Melayu mati bergelimpangan. UMNO tidak perintah Sarawak – orang Melayu boleh hidup. UMNO tidak perintah Kelantan, orang Melayu boleh hidup!

Orang Melayu jadi susah jika kerajaan rasuah, pemimpin pencuri dan menzalimi rakyat. Selagi kerajaan baik, maka orang Melayu dan semua rakyat terjamin. Yang diperlukan bukan UMNO, tapi sebuah kerajaan yang baik dipimpin oleh pimpinan yang baik. Rahsia kerajaan baik ialah pemimpin yang baik.

Kerajaan jadi jahat, jika pemimpinnya jahat, pemimpinnya rasuah, pemimpinnya mencuri dan pemimpinnya zalim.

***Datuk Mohd Ariff Sabri ialah Ahli Parlimen Raub mewakili DAP**

APA ERTI KERJASAMA PAKATAN DAN PARTI MAHATHIR?

Oleh IZMIL AMRI

Ramai yang tidak puas hati. Setelah mengetahui berulang kali bahawa Pengurus Parti Pribumi Bersatu Malaysia (PPBM) mahu partinya bergabung dalam Pakatan Harapan, akhirnya tujuan itu tidak menjadi nyata. Parti cap bunga raya pimpinan Tun Dr Mahathir Mohamad akhirnya sekadar buat perjanjian politik sahaja dengan Pakatan. Tidak jadi sekutu gabungan.

Mahathir pula tidak hadir. Barangkali kerana cita-citanya belum lagi tercapai. Setakat tandatangan perjanjian dan tidak membentuk gabungan, hantar anak sahaja cukuplah. Lim Kit Siang juga serupa. Kedua-duanya hanya hantar anak masing-masing.

Atau mungkin kerana mesyuarat semalam berlangsung di pejabat Datuk Seri Anwar Ibrahim, di tingkat empat bangunan ibu pejabat Parti Keadilan Rakyat. Meski sudah bersalam dan berbual mesra, Mahathir mungkin belum boleh masuk ke pejabat bekas timbalannya itu. Tapi tak apa, itu semua hal anekdot sahaja. Tak akan dicatat di nota kaki sejarah pun.

Namun apa yang sejarah akan rakam ialah dua acara ini. Pertamanya ceramah ‘blok ketiga’ anjuran PAS dan Ikatan di Paya Jaras, dengan kehadiran Tan Sri Muhyiddin Yassin dan juga wakil PKR, Sivarasa. Kedua, majlis menandatangani perjanjian kerjasama antara PPBM dan Pakatan Harapan, keesokan harinya.

Dalam acara pertama, PAS Selangor menghidangkan sebuah majlis yang dinamakan ‘Ceramah Mega Rakyat’. Hadir dalam acara tersebut ialah pemuka-pemuka PAS dan Ikatan, bersama Muhyiddin dan wakil PKR, setelah Datuk Seri Wan Azizah enggan hadir ke majlis tersebut.

PAS masih kekal dalam kerajaan Selangor, dan bekerja dalam satu bangunan dengan pemimpin DAP, namun tidak pula menjemput wakil DAP ke ceramah meganya itu. PAS juga masih berpatuh arang dengan rakan-rakan lama yang sudah membentuk parti baru. Sebut nama ‘Amanah’ pun tak mahu, inikan pula mahu diajak berceramah sekali untuk melawan UMNO.

Malah kita juga tidak pasti kalau ceramah itu tujuannya untuk membantai UMNO. Sudah lama sebenarnya PAS tidak kelihatan menghentam UMNO dan gejala korupsinya.

Berbalik kepada cerita ‘Ceramah Mega’.

Dalam acara tersebut, Timbalan Presiden PAS, Datuk Tuan Ibrahim Tuan Man menolak mentah-mentah cadangan Muhyiddin untuk menjadi jambatan hubungan antara PAS dan rakan-rakan yang telah mereka tinggalkan.

Tuan Ibrahim dilapor berkata “Kita tidak ada hubungan dgn DAP, Amanah, soal Bersatu nak jadi jambatan, itu tanggungjawab Bersatu, bagi PAS kita ada hubungan dengan PKR sahaja, dengan Bersatu kita pun masih dalam perbincangan.”

Dalam bahasa orang biasa-biasa seperti kita, Tuan Ibrahim secara



mudahnya berkata:

“Eh kau ni. Kita ni pun baru nak bermesra, kau nak ajak aku bermadu dengan kekasih lama?”

Lebih kurang begitulah

Acara itu kemudiannya disambut dengan majlis semalam. Muhyiddin sekali lagi disoal tentang usahanya untuk berunding dengan PAS, dan berapa lama lagi beliau mahu terus memujuk parti pimpinan Haji Hadi itu.

Wartawan dan pemerhati politik semalam rata-rata menghela nafas kecewa. Mereka bertanya, apa benda lagi yang ditunggu dengan PAS ini? Apa lagi tawaran dan janji yang mahu dan boleh diberi? Begitu pentingkah PAS dalam fabrik politik negara sehingga kalau tak ada mereka, tak menanglah parti-parti pembangkang menawan Putrajaya?

Vakum kepimpinan Melayu

Politik orang Melayu, seawal perjuangan menuntut kemerdekaan lagi, adalah permainan kelompok kecil-kecilan yang tidak rumit mana pun naratifnya. Orang Melayu hanya memerlukan seorang dua sosok pemimpin yang boleh memberi jaminan bahawa hak dan keistimewaananya terjamin, selain kedudukannya sebagai ‘tuan’ tidak digoyang-goyang.

Itu sebabnya kenapa UMNO masih lagi mampu mengekalkan kuasanya, walaupun demikian banyak bobrok dan kegilaan menimpa masyarakat. Skandal kewangan, cukai, kenaikan kos sara hidup, roti canai dan teh tarik naik harga, itu semua tidak penting asalkan Melayu kekal berkuasa.

Terpecahnya UMNO dan lahirnya parti baru Mahathir mendobrak norma pemikiran Melayu ini. UMNO akhirnya bukan satu-satunya entiti yang mampu membela nasib umat Melayu. PAS yang kini menjadi rakan dan musuh UMNO pada masa yang sama pun sudah boleh dijadikan andalan untuk mengganti peranan UMNO sebagai ‘pemimpin umat Melayu’.

Terpecahnya UMNO dan lahirnya parti baru Mahathir mendobrak norma pemikiran Melayu ini. UMNO akhirnya bukan satu-satunya entiti yang mampu membela nasib umat Melayu. PAS yang kini menjadi rakan dan musuh UMNO pada masa yang sama pun sudah boleh dijadikan andalan untuk mengganti peranan UMNO sebagai ‘pemimpin umat Melayu’.

membela nasib umat Melayu. PAS yang kini menjadi rakan dan musuh UMNO pada masa yang sama pun sudah boleh dijadikan andalan untuk mengganti peranan UMNO sebagai ‘pemimpin umat Melayu’.

Kita telah menyaksikan bagaimana UMNO cuba menjadi lebih Islam dan bermain dengan politik angin syurga dalam persidangannya yang baru selesai. Itu semua untuk memujuk sokongan Melayu yang kian condong untuk mahu beragama. Hatta UMNO pun akhirnya menampilkan ustaz penceramah televisyen sebagai perwakilan, selain membahaskan kepentingan usul persendirian Presiden PAS.

Ini semua terjadi kerana wujud kelompongan dalam kepimpinan Melayu. Kelompongan ini sekarang sedang cuba diisi parti Mahathir, dan juga PAS, selain oleh tokoh-tokoh politik Melayu dalam gabungan Pakatan Harapan.

Langkah paling cepat untuk mengisi kelompongan ini sebenarnya adalah dengan memaksa PAS ke suatu sudut, mengambil garis jelas memisahkan

‘kita’ dan ‘mereka’. Kalau bukan bersama para demokrat, kamu bersama para kleptokrat. Mudah.

Memberi ruang rundingan dan kecurangan dalam sela masa yang begitu singkat menuju pilihan raya seawal April adalah kerja yang tidak memberi keyakinan kepada rakyat.

Sudah lah calon perdana menteri pun tak ada, rakan gabungan juga tidak nyata. Maka mana dia barisan kepimpinan yang sedang bersiap untuk mengambil alih Putrajaya?

Itu pendapat ramai yang menepuk dahi apabila mengetahui parti bunga raya belum lagi masuk Pakatan.

Tetapi dalam politik, banyak perkara boleh berubah dalam masa yang sangat singkat. Justeru kita tidak boleh berhenti berharap, walaupun itulah benda paling menyampah untuk kita lakukan.

Jadi pendeknya begini. Kerjasama politik Pakatan dan parti baru Mahathir hanyalah langkah awal. Jangan inzal dulu. Soal sama ada PAS mahu kembali bertaut kasih atau mahu terus menjahanam bersama kekasih baru, kita biarlah masa yang menentukan.

PPBM setuju perjuang reformasi bersama Pakatan Harapan

PETALING JAYA: Parti Pribumi Bersatu Malaysia (PPBM) menyatakan persetujuan untuk ikut serta memperjuangkan reformasi bersama parti-parti Pakatan Harapan.

Diwakili presidennya Tan Sri Muhyiddin Yassin, PPBM hari ini menandatangani perjanjian kerjasama dengan Pakatan Harapan, dalam rangka menghadapi Pilihan Raya Umum ke-14 (PRU14) yang bakal berlangsung tidak lama lagi.

Perjanjian tersebut juga ditandatangani Setiausaha Agung DAP, Lim Guan Eng; Presiden PKR, Datuk Seri Dr Wan Azizah Wan Ismail; dan Presiden Amanah Mohamad Sabu.

Perjanjian itu antara lain menggariskan persetujuan untuk meletakkan satu calon dalam mana-mana pilihan raya, selain tidak menutup pintu bagi mana-mana parti pembangkang untuk turut serta dalam satu barisan bagi menghadapi UMNO dalam PRU14.



Perjanjian Kerjasama Pakatan Harapan dan PPBM

PERJANJIAN ini adalah di antara:

Pakatan Harapan yang diwakili oleh:
Parti Keadilan Rakyat atau KEADILAN yang diwakili oleh Presidennya Dato' Seri Dr Wan Azizah Wan Ismail;
Parti Tindakan Demokratik atau DAP yang diwakili oleh Setiausaha Agungnya Saudara Lim Guan Eng; dan
Parti Amanah Negara atau AMANAH yang diwakili oleh Presidennya Haji Mohamad Sabu

Bersama

Parti Pribumi Bersatu Malaysia atau PPBM yang diwakili oleh Presidennya Tan Sri Dato' Hj Muhyiddin Hj Mohd Yassin

Dengan ini memeterai satu perjanjian yang dinamakan Perjanjian Kerjasama Pakatan Harapan – PPBM mengenai persetujuan-persetujuan bersama oleh keempat-empat parti di dalam perkara-perkara seperti yang terkandung dalam dokumen ini.

Mewakili PAKATAN HARAPAN dan PPBM kami berjanji bahawa persetujuan-persetujuan ini akan dihormati, didokong dan dilaksanakan bersama oleh parti-parti kami selagi perjanjian ini berkuatkuasa dan persetujuan-persetujuan di dalamnya adalah mengikat keempat-empat parti.

PERJANJIAN

BAHAWASANYA Pakatan Harapan (yang terdiri daripada KEADILAN, DAP dan AMANAH); dan PPBM dengan ini bersetuju dan komited akan perkara-perkara berikut:

1. Berjuang dengan berlandaskan kepada peruntukan dan semangat Perlembagaan 1957/63 terutamanya:

i. Mempertahankan Perlembagaan Persekutuan, Islam sebagai agama bagi Persekutuan dan agama-agama lain boleh diamalkan dengan bebas, aman dan damai di di negara ini sejajar dengan Perkara 3; serta melindungi kedudukan



istikeda orang Melayu dan Bumiputra Sabah dan Sarawak dan kepentingan sah kaum-kaum lain sejarah dengan Perkara 153;

ii. Mempertahankan peranan dan tanggungjawab institusi Raja berperlembagaan; dan

iii. Memartabatkan penggunaan Bahasa Melayu sejarah dengan Perkara 152 Perlembagaan Persekutuan dan memperluaskan Bahasa Melayu sebagai bahasa ilmu dan lingua franca serantau, melindungi dan memperkuuhkan penggunaan dan pembelajaran bahasa ibunda semua kaum,

serta meningkatkan penguasaan Bahasa Inggeris demi memperbaiki daya saing Malaysia di peringkat antarabangsa.

2. Memperjuangkan Agenda Reformasi dalam kebangunan semula negara demi rakyat dengan berpaksikan nilai-nilai yang dikongsi bersama, termasuk kebenaran, keadilan, kebebasan, integriti, kebijakan dan tatakelola yang baik.

3. Meletakkan satu calon sahaja untuk mewakili Pakatan Harapan – PPBM di dalam sesuatu pilihanraya di mana-mana peringkat setelah

pembagian kerusi ditentukan melalui perundingan di antara kedua pihak berdasarkan prinsip kebolehmenangan (winnability).

4. Berunding dengan parti yang belum berada di dalam perjanjian ini untuk memastikan seboleh mungkin satu calon sahaja yang akan mewakili pembangkang bagi melawan Barisan Nasional.

5. Mewujudkan gabungan parti-parti politik pembangkang sebelum Pilihanraya Umum ke 14 dengan tujuan untuk membentuk kerajaan selepas pilihanraya.

6. Mewujudkan Jawatankuasa Teknikal Bersama untuk membincangkan pembahagian kerusi pilihanraya, manifesto dan logo bersama dan merangka gerakerja Pilihanraya Umum ke 14.

7. Atas semangat setiakawan dan kerjasama, parti-parti dalam rangka perjanjian ini hendaklah memelihara hubungan baik antara satu sama lain dan menyelesaikan pertikaian menerusi perundingan bersama.

*Perjanjian Kerjasama Pakatan Harapan – PPBM ditandatangani pada 13 Disember 2016 bersamaan 13 Rabi'ul Awal 1438 Hijrah di Petaling Jaya, Selangor Darul Ehsan, Malaysia.

TAWARAN BARU UNTUK MALAYSIA

DAP menyambut ulangtahun yang ke-50, setelah melalui suatu perjalanan yang cukup luar biasa. Daripada sebuah parti kecil yang diasaskan sekumpulan anak muda, ia kini bergerak melampaui batas-batas sebagai sekadar sebuah parti pembangkang, dan bergerak

menjadi salah satu parti utama dalam kerajaan negeri di Pulau Pinang dan Selangor, selain turut pernah menganggotai kerajaan negeri Perak.

Daripada zaman pemimpinnya terperosok di sebalik tirai-tirai besi, kini DAP melangkah di

koridor kuasa, malah telah berjaya membuktikan bahawa ia lebih berupaya mentadbir dengan lebih baik sepanjang lapan tahun lalu, sejak tsunami politik Mac 2008. Semua ini adalah hasil daripada sumbangan, pengorbanan dan disiplin para anggota serta

pemimpinnya sejak dari mula. Setiausaha Agung DAP, Lim Guan Eng dalam ucapan dasar di Persidangan Kebangsaan 2016, menyambut ulangtahun ke-50 Parti Tindakan Demokratik dengan megemukakan tawaran-tawaran baru untuk bangsa Malaysia.

Kita telah berjuang menentang demikian banyak musuh, ada yang walaupun pernah memenjarakan kita, kini telah menjadi sekutu. Sesungguhnya tidak ada kawan atau musuh yang kekal, hanya prinsip.

Dan prinsip yang menyatukan kita adalah untuk menyelamatkan sebuah negara Malaysia yang dalam berada bahaya, ekonominya dalam krisis, rakyatnya yang tidak bersalah menjadi mangsa penyalahgunaan kuasa dan rasuah, dan negara kita bertukar menjadi sebuah kleptokrasi.

Adalah untuk sebab ini kita mengalaukan kehadiran bekas Perdana Menteri Tun Dr Mahathir Mohamad ke Persidangan Kebangsaan buat kali pertama dalam sejarah parti, yang tidak pernah mempunyai RM2.6 bilion atau RM4.2 bilion dalam akaun bank peribadinya.

Pada saat yang begitu unik dalam sejarah Malaysia ini, saya tahu saya bercakap bukan hanya kepada ahli-ahli DAP dan penyokong tetapi juga kepada berjuta-juta rakyat Malaysia yang baru sahaja menyaksikan kempen pembohongan dan kebencian terhadap DAP. DAP dijadikan mangsa yang tidak berdosa dalam kempen kebencian oleh mereka yang mahu mencari kambing hitam untuk menutup kegagalan mereka.

Kita tidak akan menjadi momok bagi mereka yang mahu menuip api kebencian kaum dan agama. Dosa kita hanyalah kerana kita enggan berputus asa dengan Impian Malaysia, yang menjadi sebuah janji untuk masa depan yang lebih baik melalui sebuah lembaran baru untuk rakyat Malaysia.

DAP sebagai sebuah parti untuk rakyat Malaysia, dan Impian Malaysia

DAP adalah parti untuk rakyat Malaysia bagi semua keturunan etnik, termasuk Melayu dan Orang Asli, tanpa perbezaan geografi dan demografi terutamanya bagi Sabah dan Sarawak. Inilah dia intipati ‘Malaysian Malaysia’.

Jangan kita lupa, seperti yang dinyatakan Deklarasi Shah Alam pada 2012, DAP mempertegaskan perkara-perkara berikut dalam Deklarasi DAP@50 yang akan diluluskan Persidangan Kebangsaan hari ini:

- Mempertahankan sistem Demokrasi Berparlimen dan Raja Berperlembagaan dengan Seri Paduka Baginda Yang di-Pertuan Agong sebagai Ketua Negara.

DAP komited untuk menjunjung Perlembagaan Persekutuan Malaysia sebagai undang-undang yang paling agung negara dan meluhurkannya dalam semangat Merdeka 1957 dan Perjanjian Malaysia 1963

- Memelihara kedudukan istimewa orang Melayu dan Bumiputra serta hak-hak kaum-kaum lain, seperti yang termaktub dalam Artikel 153 Perlembagaan Persekutuan.
- Memastikan kedudukan Islam sebagai agama Persekutuan serta kebebasan untuk mengamalkan agama-agama lain dengan aman dan damai, seperti yang termaktub dalam Artikel 3 dan 11 Perlembagaan Persekutuan.
- Memartabatkan Bahasa Melayu sebagai Bahasa Kebangsaan seperti yang termaktub dalam Artikel 152 Perlembagaan Persekutuan, serta menggalakkan penggunaan dan pengajian bahasa-bahasa ibunda lain untuk membentuk masyarakat yang cemerlang dan berbilang bahasa.

Adakah semua di atas contoh “liberalisme melampau” yang mengancam Melayu dan Islam? Di Pulau Pinang, peruntukan untuk Islam adalah dua kali ganda di bawah kerajaan Pakatan tetapi kita masih dilabel sebagai anti-Islam.

Sudah tiba masanya untuk kita menolak politik identiti yang membahagikan dan mengasingkan kita melalui politik identiti perkauman yang membiakkkan kebencian dan ketakutan.

DAP menolak parti berdasarkan perkauman dan mengiktiraf kepentingan untuk bekerjasama dengan parti-parti Melayu dan tokoh Melayu yang terkemuka.

Peka terhadap isu-isu yang melibatkan orang Melayu dan orang Islam, DAP tidak pernah meminta jawatan sebagai Perdana Menteri. Dan kami tidak pernah meminta supaya seorang Cina menjadi Perdana Menteri tetapi sentiasa menyokong seorang Melayu, terutamanya Datuk Seri Anwar Ibrahim sebagai Perdana Menteri.

DAP tidak akan menguasai kerajaan sekiranya pembangkang memenangi kuasa tetapi akan menjadi rakan kongsi yang adil dan bertanggungjawab.

DAP akan mempertahankan dan menegakkan asas Perlembagaan



“Kami tidak pernah meminta supaya seorang Cina menjadi Perdana Menteri tetapi sentiasa menyokong seorang Melayu, terutamanya Datuk Seri Anwar Ibrahim sebagai Perdana Menteri.”

**- LIM GUAN ENG
Setiausaha Agung DAP**

Persekutuan yang dipersetujui pada tahun 1957 dan 1963. DAP tidak bersetuju dengan mereka yang mahu mengubah sifat tersebut dengan menggunakan undang-undang biasa yang hanya memerlukan majoriti mudah ahli-ahli Parlimen yang hadir.

Mana-mana undang-undang yang memberi kesan kepada watak dan identiti Perlembagaan Persekutuan mestilah melalui pindaan perlembagaan dengan majoriti 2/3. DAP mengulangi bantahan kepada mana-mana undang-undang yang bercanggah dengan Perlembagaan.

Mempertahankan dan menegakkan Perlembagaan Persekutuan bukanlah liberalisme yang melampau. Menentang penahanan tanpa bicara terutamanya menggunakan undang-undang penganas terhadap aktivis hak asasi

seperti Maria Chin Abdullah bukanlah liberalisme yang melampau. Tetapi mencuri berbilion-bilion ringgit wang negara secara sesuka hati adalah liberalisme yang melampau.

Oleh itu marilah kita mendakap identiti sivik berdasarkan nilai-nilai sejagat seperti kebebasan, keadilan, integriti, kedaulatan undang-undang dan demokrasi, di mana rakyat bersatu untuk kemakmuran bersama, harapan yang lebih cerah untuk masa depan dan martabat kemanusiaan untuk semua rakyat.

Marilah kita memberi komitmen untuk membina semula Malaysia yang moden; progresif dan aman, makmur dan adil.

DAP adalah parti berprinsip

DAP sentiasa komited untuk menjadi rakan kongsi yang bertanggungjawab dalam kerajaan gabungan. Dalam semangat perkongsian, kerjasama dan persefahaman, serta menghadapi realiti politik, DAP hanya bertanding 51 daripada 222 kerusi Parlimen.

Justeru, bertentangan dengan pembohongan Perdana Menteri Datuk Seri Najib Razak, tidak ada cara DAP boleh mengambil alih negara ini. Bagaimana 51 daripada 222 kerusi Parlimen boleh memerintah negara? Ini adalah aksi politik murahan dan cubaan menakutkan-nakutkan untuk mengalihkan perhatian daripada pengurusan ekonomi yang gagal.

DAP bukanlah dan tidak pernah menjadi parti Cina, atau berdasarkan kaum sejak dari awal lagi.

Kita merupakan parti rakyat Malaysia yang dipimpin oleh rakyat Malaysia dan berkhidmat demi kepentingan semua rakyat Malaysia, tanpa mengira kaum, agama, kawasan, atau jantina. DAP mempunyai wakil-wakil Melayu, Cina, India dan juga Kadazan yang dipilih sebagai Ahli Parlimen atau Ahli Dewan Undangan Negeri.

Perdana Menteri akan menyusun pilihan raya umum akan datang sebagai pertempuran antara orang Melayu yang diwakili oleh UMNO dan Cina di bawah DAP. Ini adalah imej palsu dan berbahaya!

Pertempuran pilihan raya sebenar adalah antara 1% daripada kromi BN dan 99% daripada rakyat Malaysia yang mahu Malaysia yang lebih baik.

Isu sebenarnya ialah ekonomi!

Apakah kebimbangan sebenar golongan 99%? Ekonomi! Empat isu utama yang menjadi kebimbangan besar kepada jutaan rakyat Malaysia, terutamanya orang Melayu biasa adalah: Cukai Barang dan Perkhidmatan (GST), skandal 1MDB, kejatuhan mendadak nilai ringgit, dan kos sara hidup yang meningkat seperti yang ditunjukkan oleh kenaikan harga petrol, minyak masak dan kadar tol.

Apabila pendapatan tidak meningkat, GST secara berkesan menghakis pendapatan boleh guna rakyat Malaysia. Skandal global RM52 bilion 1MDB dan skandal derma RM4.2 bilion pula telah menghakis keyakinan terhadap ekonomi dan institusi Malaysia, dan turut bertanggungjawab ke atas prestasi buruk ringgit berbanding mata wang lain.

Kita hadir dengan Tawaran Baru, lembaran baru yang menghapuskan skandal rasuah seperti 1MDB, menghapuskan GST dan kadar tol Lebuhraya Utara-Selatan demi meningkatkan taraf hidup rakyat.

Tawaran dan lembaran baru untuk golongan 99% rakyat Malaysia

Malaysia memerlukan sebuah Tawaran Baru yang berwawasan kitaran baik yang menawarkan kenaikan gaji, kemahiran yang lebih baik dan peningkatan produktiviti untuk para pekerja Malaysia dan juga industri. Kita perlu sebuah negara keusahawanan dan kebajikan yang membawa harapan kepada semua.

Kita juga harus menjamin pengangkutan awam yang lebih baik, khidmat kesihatan, pendidikan dan perumahan untuk semua rakyat Malaysia – negara berkebajikan yang memenuhi keperluan kedua-dua kawasan bandar, separa bandar dan luar bandar. Pekerjaan yang lebih baik, pertumbuhan, inovasi dan kualiti hidup yang lebih baik menyatakan kita sebagai rakyat Malaysia.

Lembaran baru untuk Sabah dan Sarawak, serta federalisme baru

Federalisme Malaysia memihak kepada Kerajaan Persekutuan yang menjelaskan hak-hak negeri. Rasa tidak puas hati di peringkat negeri adalah amat serius dan wujud keperluan ke arah suatu Tawaran Baru untuk Sabah dan Sarawak, selain suatu bentuk federalisme baru untuk negeri-negeri di Semenanjung.

DAP sedar fakta sejarah bahawa Persekutuan Malaysia dibentuk dengan gabungan empat entiti – Malaya, Sabah, Sarawak dan Singapura (meninggalkan persekutuan pada 1965) pada tahun 1963. Atas sebab ini, status Sabah dan Sarawak perlu dipulihkan semula sebagai salah satu daripada 3 entiti yang membentuk Malaysia dan tidak direndahkan sebagai hanya salah satu daripada 13 negeri lain di Malaysia.

Sepanjang 53 tahun lampau, Sabah dan Sarawak telah menjadi mangsa Kerajaan Persekutuan yang terlalu mengutamakan pusat. Rasa kecewa dan dianaktirikan melanda rakyat Sabah dan Sarawak.

DAP komited menawarkan suatu Tawaran Baru untuk Sabah dan Sarawak



Pengundi Malaysia berdepan pilihan yang begitu jelas: memilih autokrat atau demokrat, mahu kleptokrat atau Bersih

yang mengiktiraf status rakan kongsi setara dalam Persekutuan, selain mengagihkan kuasa dan hasil cukai.

Di bawah kerangka Federalisme Baru, Sabah dan Sarawak akan menikmati pelbagai autonomi dalam pempolisan komuniti, kesihatan, pendidikan, pengangkutan, selain menerima bahagian yang besar daripada hasil cukai untuk membiayai bidang-bidang kecekapan yang berautonomi itu. Kerangka Federalisme Baru tersebut juga boleh dipakai untuk Johor, Kelantan dan Pulau Pinang.

Lembaran Baru untuk Anak Muda dan Wanita

Sebagai parti yang terbina daripada idea dan nilai yang terkedepan mempromosi kesetaraan gender, DAP akan terus berusaha untuk menjadi parti pilihan wanita. Sebagai sebuah negara, kita harus memanfaatkan segala kemahiran dan bakat kaum wanita dengan berusaha untuk membanteras segala bentuk diskriminasi terhadap wanita dalam masyarakat dan juga di tempat kerja, serta mewujudkan kemudahan penjagaan kanak-kanak selain memberi sokongan kepada ibu-ibu bekerja. Hanya apabila kita dapat meningkatkan kadar penyertaan buruh wanita dari 54% sekarang menjadi 65% barulah kita berpeluang menjadi sebuah negara berpendapatan tinggi.

Kita percaya bahawa apabila wanita diberdayakan, ia bererti kita

memberdayakan negara. Dan untuk memenangi kuasa kita perlu memenangi hati wanita – itulah sebabnya kita memperuntukkan kuota gender 30% bagi Jawatankuasa Tertinggi Pusat (CEC) DAP.

Dan sebagai parti yang diasaskan anak-anak muda beridealisme dan sentiasa menyediakan ruang kepada pemimpin muda untuk muncul di segenap tahap, DAP juga akan terus menjadi parti pilihan anak muda.

DAP percaya bahawa langkah-langkah perlu diambil untuk meningkatkan pendapatan mereka dan menawarkan peluang-peluang yang lebih baik dalam pekerjaan, pendidikan dan khidmat kesihatan. Kita mesti melaksanakan dasar-dasar yang mencipta peluang pekerjaan, selain pengembangan kemahiran dan vokasional.

Kita tidak akan benarkan para kleptokrat merompak masa depan anda semua!

BERSIHkan Malaysia

Untuk membolehkan Tawaran Baru ini menjadi nyata, kita perlu membersihkan regim kleptokrasi sedia ada dan membina semula demokrasi melalui reformasi perlembagaan untuk memulihkan hak-hak rakyat.

Kita kesal dengan siri tangkapan, pendakwaan dan penindasan di bawah Akta Kesalahan Keselamatan (Langkah-langkah Khas) 2012 (SOSMA), Akta Hasutan 1948, Akta Rahsia Rasmi 1972 yang digunakan terhadap pemimpin pembangkang dan pemimpin Bersih, terutamanya Penggerusi Bersih, Maria Chin Abdullah.

Kita juga membantah Akta Majlis Keselamatan Negara 2016 yang tidak menerima perkenan Yang Di-Pertuan Agong. Untuk membina semula Malaysia, kita memerlukan institusi yang bersih, termasuklah pilihanraya yang bersih dan adil, parlimen bertaraf dunia yang mewakili suara dan keresahan semua rakyat Malaysia, media yang bebas, badan kehakiman yang bebas serta perkhidmatan awam yang neutral dan berkesan.

Penyusunan semula politik

Kita sedang berada dalam zaman yang tiada sepertinya. Sepanjang tiga tahun ini kita menyaksikan PAS bergerak menghampiri UMNO, selain mencabul konsensus pakatan pembangkang, dan mengakibatkan perpecahan PAS dan tumbangnya Pakatan Rakyat pada Jun 2015. Bersama-sama Parti Keadilan Rakyat dan Parti Amanah Negara, Pakatan Harapan dibentuk pada September 2015. Tempoh tersebut juga menyaksikan perpecahan UMNO, yang membawa kepada tertubuhnya Parti Pribumi Bersatu Malaysia.

Bolehkah DAP dan rakan-rakan gabungan memberi harapan kepada rakyat Malaysia bahawa bersama-sama kita boleh mengubah keadaan dengan segera? Adakah kita mempunyai naratif yang menarik untuk memenangi pilihan raya umum akan datang bersama-sama rakan sekutu kita? Dan bolehkah sebuah tawaran baru menjanjikan hari esok yang lebih baik untuk semua rakyat Malaysia?

Perjalanan yang belum selesai, Impian Malaysia

Garis tempur PRU ke-14 telah jelas nyata, di antara rejim tua tamat tarikh luput, dan sebuah tawaran baru, harapan baru untuk kita semua. Pengundi Malaysia berdepan pilihan yang begitu jelas: memilih autokrat atau demokrat, mahu kleptokrat atau Bersih.

Pilihan raya akan datang tidak akan mudah. Tetapi kita tidak takut. Kita akan berjuang bersama-sama, sebagai rakyat Malaysia yang saling sayang menyayangi dan menjaga satu sama lain, demi masa depan anak-anak kita dan membuat Impian Malaysia kita menjadi kenyataan.

Marilah kita bersatu sebagai satu bangsa. Bersihkan Malaysia, Selamatkan Rakyat. Terus berjuang!

*Ringkasan ucapan dasar oleh Setiausaha Agung DAP di Persidangan Kebangsaan DAP di Shah Alam pada 4 Disember 2016

Terus berjuang!

Parti Tindakan Demokratik menyambut kemuncak ulangtahun ke-50 penubuhannya 18 Mac 1966 dengan Persidangan Kebangsaan yang bertempat di Shah Alam, bagi memberikan penghargaan kepada para pimpinan dan anggota parti yang telah banyak berkorban. Turut dilancar bersama ialah buku 'TOKOH' yang merakam wawancara dengan pimpinan ulung parti, termasuk Ahmad Ton, Fadzlan Yahya, Dr Chen Man Hin, Karpal Singh dan lain-lain.

Persidangan kali ini juga menyaksikan kehadiran mantan Perdana Menteri, Tun Dr Mahathir Mohamad, buat kali pertama dalam sejarah.



4.12.2016 - DCC Shah Alam, Selangor



Selain Tun Mahathir, persidangan turut diserikan dengan kehadiran Sasterawan Negara, Datuk A. Samad Said. Turut memeriahkan majlis, persembahan koir dari DAPSY.



PERSIDANGAN TAHUNAN DAP 2016

DAP tetap sokong Anwar Ibrahim untuk jawatan Perdana Menteri

Oleh SYAZANA HASANUDIN

DAP tidak pernah meminta jawatan Perdana Menteri kerana peka terhadap isu-isu melibatkan orang Melayu dan orang Islam.

Berkata demikian, Setiausaha Agung DAP, Lim Guan Eng menjelaskan DAP dari dahulu juga tidak pernah meminta supaya seorang Cina menjadi Perdana Menteri.

"Tetapi kami sentiasa menyokong orang Melayu jadi PM, terutamanya Datuk Seri Anwar Ibrahim.

"Jadi DAP tak akan kuasai kerajaan jika pakatan pembangkang menang, tetapi akan jadi rakan kongsi yang adil dan bertanggungjawab," ujarnya dalam ucapan dasar sebagai menangkis tuduhan jahat UMNO bahawa DAP mahukan jawatan berkenaan.

Menurut Ketua Menteri Pulau Pinang tersebut, satu lagi tohongan parti pemerintah itu kononnya DAP mengamalkan liberalisme melampau juga adalah tidak berasas sama sekali.

Ia berikutnya peruntukan untuk kepentingan agama Islam di Pulau Pinang adalah dua kali ganda di bawah

pemerintahan kerajaan Pakatan Harapan berbanding zaman pimpinan BN dahulu.

Malah, sebagai tanda penghargaan kepada usaha guru-guru agama di negeri itu, Kerajaan Negeri Pulau Pinang memberi bonus sebanyak RM300 kepada 1,502 penyelia dan guru KAFA, 225 guru Sekolah Rendah Agama Rakyat, serta 185 guru Sekolah Menengah Agama Rakyat pada akhir tahun ini.

Bonus sebanyak RM200 pula disumbangkan kepada 279 guru tafhib, guru sekolah pondok dan guru Tadika Islam Pulau Pinang.

"Sudah tiba masanya untuk kita menolak politik identiti yang membahagikan dan mengasingkan kita melalui politik identiti perkauman yang membiakkkan kebencian dan ketakutan," tegas Guan Eng.

Jelasnya, walaupun PAS sudah sanggup berpeluk dengan UMNO dan tidak mempedulikan perbuatan BN menjadikan Malaysia sebuah kleptokrasi demi kepentingan politik sendiri, pakatan pembangkang mesti mempunyai keberanian untuk menyatakan rakyat bagi menyelamatkan Malaysia.

"Dan ini termasuk bekerja bersama-sama dengan



Tun Dr Mahathir Mohammad, bekas Timbalan Perdana Menteri Tan Sri Muhyiddin Yassin dan menggalakkan ahli-ahli biasa UMNO dan PAS untuk menjadi sebahagian daripada perubahan ke arah Malaysia yang lebih baik," katanya.

Beliau turut menyatakan keyakinan terhadap gabungan baharu itu yang menurutnya mampu untuk membina naratif baru dalam menentang UMNO-BN dalam Pilihan Raya Umum Ke-14.

"Pandangan saya tentang DAP dulu tidak betul" – Tun M

Oleh SYAZANA HASANUDIN & FATIH HASSAN NORDIN

SHAH ALAM: Bekas Perdana Menteri, Tun Dr. Mahathir Mohamad akhirnya mengaku bahawa pandangan beliau dahulu tentang DAP adalah tidak benar.

Beliau yang menganggap kehadiran pertamanya di persidangan itu sebagai satu 'pengalaman baru', berkata DAP adalah parti yang mewakili pelbagai kaum, bukan hanya kaum Cina semata-mata.

"Kemalaysiaan DAP jauh lebih kuat dari parti MCA. Saya dapat lihat, di antara ahli-ahli DAP yang hadir hari ini, semua kaum ada. DAP bukan parti Cina, tetapi sebuah parti pelbagai kaum.

"Pandangan saya mengenai DAP sebelum ini tidak betul," katanya disambut tepukan dan sorakan gemuruh kira-kira 1,500 hadirin.

Tun Dr. Mahathir turut

memuji penggunaan bahasa kebangsaan dalam lagu parti DAP yang sekaligus mematahkan dakwaan beberapa pihak bahawa kononnya DAP memusuhi kaum Melayu serta bahasanya.

"Walaupun DAP dituduh 'parti Cina' tapi lagu parti DAP guna bahasa kebangsaan, lagu MCA tak guna bahasa kebangsaan.

"Malah, saya bangga dengar ucapan yang disampaikan dalam bahasa kebangsaan. Ini tak terdapat dalam MCA," ujarnya.

Menurut Penggerusi PPBM berkenaan, Perdana Menteri Datuk Seri Najib Razak sengaja memainkan isu perkauman bagi memenangi hati orang Melayu.

"Dia sebut tentang DAP akan memerintah negara, sedangkan itu takkan terjadi.

"Pilihan raya bukannya tentang UMNO melawan DAP, tetapi Barisan Nasional melawan gabungan Pakatan Harapan dan PPBM," jelasnya.



Sekitar 1,500 pemimpin, perwakilan dan pemerhati berkumpul di IDCC Shah Alam pada 4 Disember lalu bagi menyertai Persidangan Kebangsaan DAP 2016 sempena meraikan sambutan ulang tahun DAP yang ke-50.

Kejutan utama ialah kehadiran bekas Perdana Menteri, Tun Dr. Mahathir Mohamad bersama pemimpin Pakatan Harapan iaitu Presiden Parti Amanah Negara, Mohamad Sabu dan Presiden Parti Keadilan Rakyat, Datuk Seri Dr. Wan Azizah Ismail.

Sebelum ini, Tun Mahathir yang juga Penggerusi Parti Pribumi Bersatu Malaysia (PPBM) turut memunculkan diri di Konvensyen Pakatan Harapan.

Najib sudah rasa BN akan kecundang dalam PRU-14

Oleh HAFIZ ZAINUDDIN

SHAH ALAM: Pemangku Penggerusi DAP Kebangsaan, Tan Kok Wai berkata Presiden UMNO, Datuk Seri Najib Razak mungkin sudah merasakan hayat parti itu sudah tiba ke penghujung dalam Pilihan

Raya Umum ke-14 (PRU14) yang dijangka berlangsung tahun hadapan.

"Saya percaya Datuk Seri Najib telah merasakan kekalahan BN dalam PRU14 akan datang.

"Najib main tipu daya dengan kata DAP tolak

kedudukan istimewa Melayu dan agama Islam. Ini fitnah jahat! Walhal, perlembagaan DAP jelas mengatakan kita mahu pulihkan Perlembagaan Malaysia kepada kerangka asal!" tegas Ahli Parlimen Cheras itu dalam ucapannya.

Kok Wai berkata, serangan

bertubi-tubi UMNO terhadap DAP dalam Persidangan Agung UMNO juga membuktikan BN semakin takut dan tertekan dengan kekuatan Pakatan Harapan.

"Dia takut Pakatan Harapan akan menang. Dia bukan sahaja takut kita bina lebih banyak

kemudahan hospital dan sekolah, tetapi dia juga takut kita bina lebih banyak penjara.

"Rakyat tahu siapa 'MO1' ('Malaysia Official 1'). Tapi satu yang memang diketahui oleh Najib, iaitu UMNO- BN sudah jadi MR1. apa itu MR1- Musuh Rakyat nombor 1!", katanya.

APA KATA PERWAKILAN?

Persidangan Kebangsaan DAP 2016 menutup tirainya dengan pelbagai cadangan dari perwakilan yang mahu supaya parti memberi tumpuan kepada kerjasama Pakatan Harapan dalam menghadapi Pilihan Raya Umum ke-14 akan datang.

Ia juga menjadi platform kepada pemimpin dan para perwakilan menjawab segala tohmahan dan fitnah jahat yang dilemparkan pemimpin-pemimpin UMNO terhadap parti.

Dalam ucap tamanya, **Pemangku Pengurus DAP Kebangsaan, Tan Kok Wai** menegaskan bahawa DAP menjunjung keluhuran Perlembagaan Persekutuan sebagai undang-undang tertinggi dalam negara.

“Di dalam Perhimpunan Agung UMNO, Najib cuba bermain tipu daya dengan mengatakan DAP menolak kedudukan istimewa orang Melayu dan Islam sebagai agama Persekutuan kerana semua itu tidak disebutkan di dalam Perlembagaan DAP.

“Itu ternyata satu fitnah jahat memutarbelitkan fakta sebenar yang mana Perlembagaan DAP jelas menyatakan antara matlamat-matlamat DAP adalah ‘mengesahkan dan memulihkan Perlembagaan Malaysia kepada kerangka asal’,” tegasnya.

Perwakilan dari Pahang, Datuk Mohd Ariff Sabri, berkata tohmahan jahat Presiden UMNO baru-baru ini membuktikan DAP semakin mendapat tempat di hati masyarakat Malaysia khususnya orang Melayu.

“Sebab apa dia takutkan Melayu, sebab DAP berkembang dan dapat sokongan Melayu,” katanya yang juga Ahli Parlimen Raub.

Menurutnya lagi, UMNO bertindak demikian kerana parti itu mahu memesongkan perhatian rakyat dari masalah ekonomi dan penyelewengan yang melanda negara saat ini.

“Ini satu pembohongan terang-terangan UMNO terhadap orang Melayu.

“Faktanya ialah, Malaysia negara di mana orang Melayu dominan. Demografi ialah masa depan atau destinasi. Ketua Negara ialah Melayu. Sesiapa sahaja orang Melayu, dari parti mana pun, boleh jadi Perdana Menteri,” katanya.

Jelas Ariff, pembohongan parti pemerintah itu langsung tidak berlandaskan fakta sedangkan sudah jelas bahawa kepentingan kaum Melayu dan Bumiputera negara ini termaktub dan dijamin Perlembagaan Persekutuan.

Perwakilan dari Johor, Sheikh Omar Ali pula menegaskan DAP meraikan kepelbagaiannya kaum dan agama serta tidak akan memilih pendekatan terdesak seperti UMNO-Barisan Nasional.

Menurutnya, DAP menjunjung semangat Demokrasi Sosial serta akan mendekati rakyat dengan dasar-dasar yang baik demi Malaysia yang lebih sejahtera buat semua merentasi kaum, wilayah dan agama.



“Sebab apa dia takutkan Melayu, sebab DAP berkembang dan dapat sokongan Melayu”

- ARIFF SABRI
Perwakilan Pahang

“Jika dalam PAU 2016 mereka (pemimpin UMNO) memainkan sentimen perkauman yang sangat jahat, kita (DAP) mahu beritahu kepada UMNO dan PAS, serta seluruh rakyat, bahawa DAP tidak akan ambil jalur perkauman.

“Tetapi kita akan ambil pendekatan yang mendekati rakyat dengan polisipolisi baik untuk Malaysia,” ujar Penolong Setiausaha Publisiti DAP Johor itu.

Perwakilan Sabah, Chan Foong Hin, menyelar tindakan wakil rakyat DAP yang melompat parti.

“Saya tidak faham ada orang sudi meninggalkan Roket dan sertai parti lain.

“Saya bersyukur menyertai DAP sebagai parti Malaysia dan bukannya ‘parti Malaya’ di mana DAP berjuang untuk kesamarataan semua tanpa mengira kaum mahupun wilayah,” ujarnya yang juga ADUN Sri Tanjung.

Perwakilan Sarawak, Chew Chin Sing mengambil kesempatan untuk mengucapkan terima kasih kepada seluruh pemimpin dan ahli-ahli DAP yang telah berkorban tenaga, masa dan wang ringgit membantu pilihanraya negeri sebelum ini.

“Saya lihat kita di Sarawak kena bekerja lebih keras untuk menang,” katanya yang juga Timbalan Pengurus DAP Sarawak.

Perwakilan dari Melaka, Low Chee Leong, pula mencadangkan supaya maklumat parti sampai hingga ke peringkat akar umbi.

Menurutnya, ini amat penting supaya

masyarakat, khususnya di luar bandar mendapat maklumat yang benar mengenai perjuangan parti.

“Editorial Roket harus diberi kepujian dan usaha mereka harus dinilai dengan tinggi dalam pergerakan perjuangan demokrasi.

“Saya mencadangkan supaya pengedaran akhbar-akhbar The Rocket pelbagai bahasa dilipatgandakan dalam masa terdekat bagi tujuan penyampaian maklumat selain dari penyebaran melalui media sosial,” ujar Low.

Perwakilan Perak, M. Manogaran, pula menarik perhatian perwakilan apabila beliau membangkitkan kesediaan Pakatan Harapan untuk menghadapi PRU-14.

“Bagi saya, DAP Perak sedia kerana dalam PRU-12 dan 13 kita menang semua 18 kerusi DUN. Masalahnya sekarang, jika kita sudah sedia, adakah rakan-rakan Pakatan Harapan bersedia?

“Adakah kita sekarang ini akan bertanding di bawah satu simbol atau berasingan?” soalnya.

Jelas Manogaran, bertanding menggunakan hanya satu simbol lebih memberikan kelebihan kepada gabungan Pakatan Harapan dan PPBM.

Perwakilan Kuala Lumpur, Sally Sian Kian Eng, mahu supaya DAP mengukuhkan persefakatan parti-parti yang bersetuju untuk bersama dengan Pakatan Harapan.

“Sudah sampai masanya kita membuat penegasan dan memberikan komitmen dengan bersungguh-sungguh kepada Pakatan Harapan.

“Mana-mana parti yang masih ‘main-main’ dan tidak konsisten seperti PAS, jangan kita tunggu. Kita sendiri telah lihat bagaimana PAS nampaknya lebih mesra dengan UMNO yang terpalit dengan pelbagai skandal rasuah.

“Kita tidak bersatu kerana wang. Kita tidak bersatu kerana fahaman sempit perkauman. Kita tidak bersatu kerana kita bencikan Barisan Nasional. Tetapi, kita bersatu kerana kita punya agenda besar iaitu agenda untuk menyelamatkan Malaysia dari menjadi negara gagal!” katanya.

“Saya meminta pemimpin kita berhati-hati apabila memilih sekutu. Kita mesti pastikan prinsip mereka selaras dengan kita”

- SANGEET KAUR DEO
Perwakilan Selangor

Perwakilan Selangor, Edry Faizal Eddy Yusof, berkata pemimpin DAP perlu lebih berhati-hati dalam mengeluarkan sebarang kenyataan kerana ia dikhuatir akan dimanipulasi pihak tertentu.

“Mereka yang sudah menjadi orang-orang penting dalam parti hendaklah lebih berhati-hati, dan berfikir dalam membuat sebarang kenyataan terbuka.

“Kita harus meletakkan satu standard lebih tinggi berbanding menteri-menteri UMNO/BN yang sudah terkenal kelakar. Ada beberapa kerisauan sekiranya kita tidak berhati-hati dalam kenyataan kita,” kata Edry.

Seorang lagi perwakilan dari Selangor, **Sangeet Kaur Deo** pula meminta DAP sentiasa berwaspada dengan bakal sekutunya serta memastikan agar matlamat mereka benar-benar jujur dalam perjuangan.

Anak perempuan mendieng Karpal Singh itu bagaimanapun bersetuju dengan kenyataan Setiausaha Agung DAP Lim Guan Eng bahawa tidak ada kawan atau musuh yang kekal dalam politik, dan apa yang terus kekal adalah prinsip parti.

“Saya meminta pemimpin kita berhati-hati apabila memilih sekutu. Kita mesti pastikan prinsip mereka selaras dengan kita,” katanya, merujuk kepada gabungan baru yang ditubuhkan antara Pakatan Harapan dengan PPBM.

Kegusaran Sangeet itu timbul ekoran Tun Mahathir merupakan individu bertanggungjawab terhadap penggunaan sewenang-wenangnya Akta Keselamatan Dalam Negeri (ISA) dan Akta Hasutan ke atas pemimpin-pemimpin pembangkang di zaman pemerintahan beliau.

Namun, Guan Eng dalam ucapan penggulungannya menangani isu yang dibangkitkan Sangeet dengan berkata bahawa DAP dan Tun Mahathir kini berkongsi matlamat sama untuk mengalihkan kerajaan BN yang ‘rasuah’.

“Walaupun Tun Mahathir pernah menjadi musuh politik kita, tetapi beliau sudah sedar. Dan apa yang kita inginkan sekarang adalah untuk lebih ramai orang sedar (tentang kezaliman UMNO BN).

“Kerajaan BN nak hapuskan DAP dan Pakatan Harapan dalam PRU14 akan datang. Tapi kita tak akan biarkan ia terjadi,” tegasnya.

Orang Asli Gua Musang bangunkan semula blockade halang pembalakan

GUA MUSANG: Pantang undur. Begitulah semangat yang ditunjukkan Orang Asli Temiar di sini membangunkan semula kawasan blockade Cawas, Pos Bihai yang telah dimusnahkan pihak berkuasa baru-baru ini.

Mereka nekad membangunkan semula kawasan itu untuk mengelakkan berlakunya semula pembalakan yang menjejaskan kehidupan mereka. Pembinaan melibatkan penduduk dari tiga wilayah iaitu Angkek, Depak dan Bihai.

Menurut Setiausaha Jaringan Kampung Orang Asal Kelantan (JKOA), Mustafa Along, pembinaan semula itu perlu dilakukan demi mempertahankan saki baki hutan yang ada.

"Walaupun blockade dirobohkan, rumah diruntuhkan, kami akan pertahan. Sekarang rakan-rakan saya sedang membangunkan semula khemah (pondok) untuk tidur. Bila siap semua, kami akan bina blockade," katanya kepada The Rocket.

Beliau menegaskan, komuniti di sini bukan sekadar menuntut hak mereka tetapi juga kepentingan masyarakat di luar kerana jika kawasan tersebut dilanda bencana, ia akan menjejaskan kawasan hilir yang kebanyakannya kawasan penempatan penduduk dan bandar.

Beliau berkata demikian ketika ditemui dalam program solidariti dan penyampaian sumbangan oleh NGO Himpunan Hijau kepada masyarakat Orang Asli setelah Jabatan Perhutanan Kelantan bertindak meruntuhkan blockade yang didirikan penduduk dan kemudian menahan 54 individu.



60 tahun merdeka, Orang Asli dapat apa?

"Apa yang telah dilakukan kerajaan UMNO-BN terhadap kehidupan hampir 200,000 Orang Asli di negara ini?"

Persoalan itu dibangkitkan Ketua Parlimen DAP Lim Kit Siang ketika berucap di hadapan sekitar 100 Orang Asli dan aktivis di Pos Bihai dalam program itu.

Katanya, kerajaan seolah-olah telah meminggirkkan jasa bakti Orang Asli yang berkorban demi negara dalam pasukan Senoi Perak suatu masa dahulu melawan anasir komunis.

Lebih menyediakan apabila kakitangan jabatan yang menguruskan hal ehwal Orang Asli iaitu Jabatan Kemajuan Orang Asli (JAKOA) hanya diisi sebilangan kecil komuniti itu.

"Sudah hampir 60 tahun negara ini

merdeka. Apa yang Orang Asli dapat di negara kita? Adakah kedudukan dan hak Orang Asli dipertahankan oleh kerajaan?" kata Ketua Parlimen DAP Lim Kit Siang.

Beliau mencadangkan supaya Perlembagaan Persekutuan dipindahkan supaya kedudukan Orang Asli yang merupakan pribumi terawal negara ini diangkat supaya dapat menikmati hak keistimewaan setaraf Bumiputera dan kaum Melayu.

Turut serta mengikuti program itu ialah Ketua Pembangkang DUN Pahang, Tengku Zulpuri Shah yang berkata bahawa kerajaan PAS Kelantan perlu mencari alternatif ekonomi yang baru selain hanya bergantung kepada pembalakan dan perlombongan bagi menampung perbelanjaan mereka.

ADUN Mentakab itu juga mahu supaya semua pihak yang terbabit bertanggungjawab dan tidak

menyalahkan 'takdir' sekiranya bencana bah besar berulang.

"Hutan dah banyak tebang, makin tak ada. Kalau hujan lebat dan banjir besar berlaku lagi, jangan salahkan tuhan sebab ini dari tangan kita sendiri, dari pengurusan yang lemah," katanya lagi.

Wujudkan pengurusan hutan lestari

Pengerusi NGO Himpunan Hijau, Wong Tack pula mahu supaya kerajaan negeri ikhlas berunding dan menyelesaikan masalah Orang Asli termasuk melaksanakan peraturan dan dasar pengurusan hutan yang lestari.

"Akibat pengurusan hutan yang tidak lestari, bencana banjir telah berlaku. Di sini pentingnya kita ambil kira perubahan iklim dunia yang sudah berubah di mana musim kemarau atau hujan boleh jadi lebih panjang," jelas Wong Tack.

Katanya, perbincangan melibatkan semua pihak termasuk pakar alam sekitar perlu menjadi keutamaan sebelum apa-apa keputusan melibatkan pembalakan dibuat.

"Industri pembalakan perlulah mampan dan lestari demi mengekalkan kewujudan hutan dan keseimbangan alam. Apa yang paling penting, ia bukan sahaja mengekalkan alam sekitar yang baik tetapi juga tidak mendatangkan kesan buruk yang menjejaskan masyarakat Orang Asli," ujarnya.

Himpunan Hijau hadir dengan 10 kenderaan untuk menyampaikan sumbangan orang ramai berupa barang keperluan harian seperti beras, gula, susu, minyak masak dan sebagainya kepada komuniti Orang Asli.

Salahkah Orang Asli ada pendirian sendiri?

Oleh HAFIZ ZAINUDDIN

Seramai 54 Orang Asli dalam dua penahanan di Gua Musang sebelum ini memberi dorongan moral terhadap perjuangan mempertahankan wilayah mereka dari terus gondol akibat pembalakan.

Ia tidak melemahkan semangat Orang Asli di sini yang nekad membangunkan semula kawasan blockade mereka yang telah dimusnahkan pihak berkuasa negeri.

Perjuangan pahlawan Temiar ini mempertahankan tanah dan hutan warisan sejak zaman-berzaman itu dari musnah bagaimanapun dipandang serong oleh sesetengah pihak khususnya pemimpin PAS Kelantan.

Mereka cuba menggambarkan kebangkitan Orang Asli sebagai akibat daripada hasutan 'pihak luar'.

'Kami tak salah, ini tanah nenek moyang kami'

Ayap bin Uda, 60 memberitahu The Rocket ketika lawatan di blockade Cawas Pos Bihai bahawa apa yang dilakukan komunitinya adalah hak mereka.

"Kami yang buat blockade, memang hak kami," katanya.

Menurutnya, sokongan dari komuniti sekitar kepada perjuangan hak tanah juga

amat menggalakkan kecuali sebahagian yang bekerja dengan kerajaan atau mempunyai pertalian kuat dengan kerajaan.

Limat bin Lias berusia 40-an pula berkata, sepatutnya apa yang dilakukan oleh Orang Asli dengan membina blockade adalah sesuatu yang tidak salah.

"Ada pihak-pihak kerajaan (negeri) mengatakan tindakan kami pengaruh dari orang luar dan kami buat blockade salah, sebab dalam hutan simpan."

"Jadi saya nak bagitau, kami ni awal sudah duduk dalam negeri kelantan. Bagi kami tak salah. Kami duduk ratus tahun daripada nenek moyang kami dulu," tegasnya.

Kata Limat, komunitinya juga berhak untuk diwakili peguam sekaligus manafikan tohmahan jahat pemimpin PAS Kelantan kononnya komuniti Orang Asli Temiar Kelantan telah dihasut pihak luar.

"Ada yang mengatakan Siti Kassim mempengaruhi kami. Tapi bagi kami Orang Asli, kami kalau ada masalah, kami memang berhak atas peguam. Kalau tak ada peguam siapa nak bicarakan di mahkamah?"

"Ada yang katakan, NGO membantu Orang Asli. Bagi kami, kami menegakkan hak tak salah, siapa yang ingin bantu kami,

kami terima, ini adalah jalan yang benar. Kalau kami buat benda tak betul, saya rasa NGO pun tak sanggup membantu."

"Bila blockade ni diroboh, kami rasa kami dihina dan dipinggir. Jadi kami harap kepada semua NGO, kalau boleh sudilah membantu kami," ujarnya lagi.

Limat menegaskan, komunitinya kini bangkit untuk mempertahankan hak-hak mereka yang sekin terancam oleh pembalakan dan pembukaan ladang-ladang hutan.

PAS Kelantan elak isu sebenar

Sebelum ini Ketua Penerangan Pemuda PAS Kelantan, Nazman Che Iberahim membuat laporan polis terhadap peguam dan aktivis Orang Asli Kelantan, Siti Kasim kononnya menjadi penghasut.

Laporan itu antara lain menuduh bahawa peguam itu menghasut Orang Asli membenci dan menentang kerajaan negeri.

"Tak boleh terima realiti yang Orang Asli ada pendirian dan otak sendiri," kata Siti di Facebook beliau.

Menurut Siti, jika tindakan menasihati anak guam terhadap hak mereka dan membantu mereka bebas dari tahanan dianggap 'menghasut', maka, Pemuda PAS wajar membuat laporan polis terhadap semua peguam yang melakukan perkara yang serupa terhadap anak guam mereka.

Selain Siti Kassim, laporan polis turut dibuat ke atas beberapa aktivis alam sekitar yang lantang menyuarakan pandangan dalam isu pembalakan di Gua Musang.

Menurut aktivis Badan Gabungan Aktivis Alam Sekitar Kelantan Malaysia (BUMI) merangkap Pengerusi Jawatankuasa Penaja Royalti Malaysia, Syam Ghaz, tindakan itu semata-mata untuk menutup kelemahan pengendalian kes-kes Orang Asli.

"Kami dari komuniti BUMI membantu orang asli dari segi siasatan kes yang berlaku dalam kawasan Blockade Gua Musang sahaja, untuk kepastian pihak kami dan orang awam," katanya dalam satu kenyataan.

Tegasnya, laporan polis oleh Pemuda PAS Kelantan itu mempunyai niat serong bagi mengalih perhatian media kepada isu bantahan orang asli terhadap pembalakan khususnya selepas pembebasan 54 Orang Asli yang ditahan sebelum ini.

"Apakah salah Orang Asli hingga mereka diperlakukan sedemikian rupa? Tiada belas ehsan kah PAS Kelantan kepada Rakyat Kelantan? Mereka juga rakyat Kelantan. Janganlah kalut bantu Rohingya saja, hingga rakyat dibawah tanggungan sendiri diabaikan," katanya.



Rakyat Sabah naik keretapi 'mayat', gerabak tanpa bumbung dan dinding

SANDAKAN: Menyediakan. Itulah yang menggambarkan nasib sebahagian pengguna keretapi di beberapa buah kampung di Tenom, Sabah yang terpaksa menaiki gerabak terbuka untuk pergi ke destinasi masing-masing.

Kedhaifan dan risiko bahaya yang telah dialami bertahun-tahun itu terpaksa diharungi penduduk dari empat buah kampung di Tenom iaitu Kampung Pangi, Kampung 78, Kampung Rayu dan Kampung Kolondos daerah tersebut.

Kesal dengan keadaan tersebut,

Pengerusi DAP Sabah, Stephen Wong Tien Fatt berkata kedhaifan sistem pengangkutan awam di Sabah khususnya perkhidmatan keretapi bukanlah perkara baru.

"Saya sedih bila melihat penduduk kampung terpaksa tanggung risiko dan bahaya berhimpit-himpit atas pelantar keretapi tanpa bumbung dan dinding."

"Keadaan ini amat memalukan apabila rakyat Malaysia di Sabah masih terpaksa bergantung kepada sistem keretapi yang dibina sejak zaman penjajah lagi," katanya.

Menurutnya, kerajaan BN melayan Sabah secara tidak adil apabila tidak bertindak segera memperbaiki sistem pengangkutan keretapi negeri itu sebaliknya memperuntukkan RM55 bilion bagi keretapi laju pantai timur sebanyak RM55 bilion.

"Saya menggesa kerajaan BN supaya segera menaiktaraf keseluruhan sistem perkhidmatan keretapi di Sabah supaya rakyat di sini dapat menikmati kemudahan itu dengan selesa dan sempurna seperti di Kuala Lumpur," tegas beliau.

Selepas dua tahun minum air hujan, Impian Sabah baiki bekalan air BN

Oleh KAMSI AHMAD

KENINGAU: Sejak dua tahun lalu, sekitar 90 keluarga di Kampung Kitou di sini terpaksa bergantung kepada air hujan dan anak-anak sungai sebagai sumber minuman dan keperluan harian mereka.

Kehidupan mereka terganggu setelah sistem air graviti 'mahal' yang disediakan kerajaan BN bernilai RM500,000 pada 2014 itu hanya berfungsi selama 18 hari sahaja sebelum mengalami kerosakan.

Walaupun aduan telah dibuat untuk membaik pulih sistem air tersebut kepada kerajaan dan beberapa pihak lain, masalah mereka tidak dilayan.

Kunjungan DAP ke kampung

tersebut sejak beberapa bulan lalu menghidupkan kembali impian penduduk di sini untuk melihat sistem air graviti 'mahal' itu kembali berfungsi.

Kini, penduduk Kampung Kitou boleh menarik nafas lega apabila sistem air graviti kampung mereka sedang dibaik pulih Impian Malaysia secara gotong-royong setelah mengadakan perbincangan dan perancangan rapi.

Menurut Pengerusi DAP Keningau, Peter Saili, ini bukanlah kali pertama DAP melalui Impian Sabah membantu masyarakat di pedalaman Sabah menikmati kemudahan asas yang diabaikan BN.

Projek-projek membina infrastruktur asas oleh DAP melalui Impian Sabah dibiayai melalui dana yang dikutip daripada sumbangan orang ramai yang prihatin di seluruh Malaysia.



KAPIT: Di saat para Menteri mendabik dada kononnya Malaysia semakin menghampiri status negara maju, masih ada rakyat di negara ini tidak mempunyai bekalan air yang bersih.

Ketidaaan air yang sempurna telah menyebabkan penduduk Tr Sabang Nanga Buya di Pelagus sukar melakukan rutin harian mereka.

Selain terpaksa mandi di sungai, bekalan minuman yang merupakan asas untuk hidup juga tidak mencukupi di kawasan tersebut.

Bagi memastikan penduduk Tr Sabang memperoleh hak mereka, DAP Kapit bersama Impian Sarawak telah berjaya menaik taraf bekalan air di kawasan tersebut.

Projek naik taraf bekalan air berkenaan bermula pada 3 November sehingga 7 November lalu. Fasa terakhir projek itu telah pun disiapkan pada 10 Disember lepas.

Menurut Setiausaha DAP Kapit, Larry Asap, beliau bersama Paren Nyawi dari DAP Katibas dan Impian Sarawak telah berkunjung ke rumah panjang Tr Sabang baru-baru ini bagi meninjau masalah yang dihadapi penduduk.

Permohonan masyarakat di situ supaya sistem bekalan air mereka dinaik taraf



Penduduk rumah panjang gembira Impian Sarawak bantu naik taraf bekalan air

disetujui supaya bekalan air berterusan.

"DAP akan sentiasa turun padang dan komited dalam memberi khidmat kepada rakyat memerlukan. Kita mahu melihat rakyat mendapat kemudahan asas yang terbaik supaya taraf hidup meningkat,"

katanya dalam ucapan perasmian projek.

Pengerusi DAP Katibas, Paren Nyawi pula menjelaskan, Impian Sarawak merupakan satu program yang menunjukkan komitmen dalam menyediakan kemudahan asas terbaik

kepada penduduk di negeri itu.

"Program Impian Sarawak akan diteruskan dari masa ke masa agar lebih ramai penduduk menikmati kemudahan yang sepatutnya menjadi hak semua rakyat Malaysia," tegasnya.

AHMAD TON: KALAH BUKAN BERERTI TEWAS

Oleh HAFIZ ZAINUDDIN

Pada 1976, tokoh Johor, Hussein Onn menjadi Perdana Menteri Malaysia ketiga mengantikan Tun Abdul Razak yang meninggal dunia. Dalam senyap-senyap, seorang lagi anak Johor mencatatkan sejarah tersendiri apabila menubuhkan sebuah cawangan 'Melayu' DAP yang pertama di negerinya, iaitu di Kampung Padang Sari, Batu Pahat.

Anak tempatan itu namanya Ahmad bin Ton atau lebih dikenali dengan Ahmad Ton, nama yang penting walau kurang dikenali ramai generasi masakini, sepanjang penglibatannya secara aktif 40 tahun bersama DAP. Saya mesra memanggilnya Pak Ahmad sahaja.

Beliau yang kini berusia 67 tahun sebenarnya pernah bertanding tujuh kali dalam pilihanraya umum, serta memegang pelbagai jawatan di peringkat kebangsaan dan negeri, termasuk Naib Pengerusi DAP Kebangsaan dan Naib Pengerusi DAP Johor.

Zaman 1970-an merupakan era perlawanan terhadap sistem kapitalisme acuan Amerika Syarikat yang bangkit daripada semangat mahasiswa global, termasuk di Malaysia. Kebangkitan mahasiswa di Malaysia pula banyak berkait dengan semangat mereka mahu menghubungkan perjuangan luar bandar, khususnya petani dan nelayan. Hasil kerjasama mahasiswa-orang kampung adalah kebangkitan Baling di Kedah, Teluk Gong di Selangor, dan Tasik Utara di Johor.

Bagi orang yang melawan seperti Ahmad Ton, ini adalah saat penting perisytiharan 'rasmi' beliau untuk bangkit menentang ketidakadilan. Dia melawan kerana pengkhianatan dan pembohongan pemimpin UMNO yang berlaku terhadap masyarakat di kampungnya pada ketika itu.

"Tanah orang kampung, pemimpin UMNO jual kepada orang lain," gagah Pak Ahmad bicaranya kepada saya, perlahan dan tersekat-sekat; dan sedikit, perasaan saya diselubung sedih bercampur rasa hormat, beliau masih kental melawan.

Perbualan saya dengannya turut disertai anak sulungnya Mohd Yusof, 36, yang kini Pegawai Yayasan MARA Johor dan isteri pertamanya, Misbah binti Hussein, 61. Kami bertandang terus kerumahnya di Kampung Padang Sari, Batu Pahat selang beberapa hari selepas temujanji. Menurut Yusof, sebelum menjadi ahli DAP, ayahnya bersama masyarakat kampung gigih memperjuangkan sebidang tanah untuk dibangunkan bagi kepentingan penduduk. Pada awalnya, pemimpin UMNO setuju tanah itu diserahkan bagi kegunaan masyarakat tetapi apa yang berlaku sebaliknya, pemimpin UMNO itu telah menjualnya kepada pihak ketiga dan mengaut keuntungan.

Kesal dengan pengkhianatan dan sikap tidak endah pemimpin itu terhadap kepercayaan yang diberi penduduk kampung, Pak Ahmad, yang pernah memegang jawatan Setiausaha UMNO Cawangan Tiga Serumpun (meliputi Kampung Padang Sari, Parit Awang, Parit Salam dan Parit Lapis Batu Puteh, Simpang Lima) membulatkan keputusan meletak jawatan.

Tubuh cawangan DAP di kampung, diboikot lima tahun

Tindakan meletak jawatan itu mungkin boleh dijangka sesiapa, namun apa yang mengejutkan, Ahmad Ton menubuhkan cawangan DAP di Padang Sari sekitar tahun 1976 dengan keahlian kira-kira 30 orang, dan menjadikan rumahnya sendiri sebagai bilik gerakan.

Ia merupakan pengisytiharan rasmi beliau untuk meneruskan perjuangan membela masyarakat dan mengembalikan keadilan.

Menyedari sikap orang Melayu tentang DAP, saya bertanya, "Kenapa memilih DAP sedangkan ada parti pembangkang yang lebih ramai orang Melayu seperti PAS?" Jawab beliau: "Kerana DAP orang perjuangan."

Bukan suatu yang aneh apabila kepimpinannya dalam Jawatankuasa Tertinggi Pusat (CEC) DAP 1989 digandingkan dengan ramai tokoh-tokoh parti seperti Lim Kit Siang, Ahmad Nor, Fadzlan Yahya, P. Patto, Peter Paul Dason, Hu Se Pang, Chen Man Hin, dan ramai lagi.

Namun, penglibatan langsung beliau bersama DAP yang sentiasa diserang propaganda Perikatan dan kemudiannya Barisan Nasional sebagai 'parti chauvinis Cina', 'anti-Melayu' dan 'anti-Islam' telah membawa rasa dukacita buat ayah kepada lapan orang anak ini.

Pada tahun itu, rombongan takbir raya selepas sembahyang Hari Raya Aidilfitri tidak singgah ke rumah mereka seperti tahun-tahun sebelumnya. Begitu dengan kedai runcit yang diusahakan keluarga, tidak dikunjungi orang kampung.

Keadaan itu berlaku sepanjang lima tahun seterusnya.

Malaysian Malaysia

Ahmad Ton pernah berkata misi Malaysian Malaysia adalah misi yang betul kerana tanpa misi ini, Malaysia tidak akan maju kehadapan.

Pembinaan negara perlu melibatkan seluruh kaum dalam negara ini supaya nikmat dan kemakmuran ekonomi dapat dirasai secara adil supaya tidak ada kelompok masyarakat tertinggal. Sekaligus, jurang miskin dan kaya yang sering dikaitkan dengan sentimen perkauman dapat dibendung dan perlahan-lahan hilang.

Beliau berkata, meskipun Barisan Nasional melaungkan slogan-slogan berkonsepkan Malaysia Malaysia, ia hanya indah khabar dari rupa.

Seperti juga Slogan 1Malaysia yang dilancarkan Perdana Menteri Datuk Seri Najib Razak yang kini sudah tidak dipedulikan kerana dipenuhi dengan pentadbiran yang tidak bersih, korup, salah guna kuasa dan zalim.

"Ia umpama slogan palsu apabila digunakan hanya untuk menutup segala kelemahan berikutnya isu perkauman yang melanda negara. Hanya muhununjuk kepada negara luar.

Prinsip DAP ketika ditubuhkan pada 1966 ialah Malaysia Malaysia. DAP memang mahu mewujudkan satu rupa bangsa dalam pelbagai wajah-berbilang kaum," jelas beliau.



Sumbangan kepada parti dan masyarakat

Penglibatan beliau bersama DAP merupakan cabaran besar kepada beliau untuk mengemudi parti di Johor. Dengan fitnah dan stigma 13 Mei 1969 yang masih kuat masa itu, suka atau tidak, beliau meneruskan usaha untuk mengembangkan DAP di seluruh Johor kerana yakin bahawa perjuangan DAP yang mengangkat tema keadilan, kesaksamaan dan kebebasan merupakan aspirasi sebenar yang perlu dihayati seluruh rakyat Malaysia.

Selain jawatan Pengerusi DAP Cawangan Kampung Padang Sari, sekitar tahun 1977, beliau diberi amanah menjawat sebagai Setiausaha Organisasi Luar Bandar. Pada tahun 1981, sewaktu menjawat Setiausaha DAP Negeri, sebanyak 30 buah cawangan DAP telah bergerak aktif dengan keahlian sekurang-kurangnya 30 peratus di kalangan kaum Melayu. Selain dirinya sendiri, antara tokoh-tokoh Melayu yang dikenali dalam DAP Johor antaranya ialah Khalid Halim di Kluang dan Abdullah Abdul Hamid berpusat di Tampoi. Pada 1982, DAP Johor terus memperlihatkan penerimaan rakyat negeri itu apabila beberapa cawangan baharu ditubuhkan dengan peningkatan keahlian sehingga 400 orang. Antara cawangan tersebut ialah di Johor Bahru, Bukit Pasir (Muar), Pontian Kecil dan Bukit Batu (Kulai).

Tahun yang sama juga Ahmad Ton menjadi calon bagi kerusi Dewan Undangan Negeri (DUN) Peserai, Johor dalam Pilihan Raya Umum ke-6 tahun 1982 menentang pencabar dari UMNO Ridzuan Salim namun tewas dengan majoriti 9,363 undi.

Riau gelombang keras politik tanah air terutamanya sebelum dan selepas beberapa insiden seperti Operasi Hapus di Memali tahun 1985 dan Operasi Lalang 1987 yang menyaksikan sebahagian besar pemimpin utama DAP diletakkan di bawah Akta Keselamatan Dalam Negeri (ISA) menjadikan beliau lebih bersemangat untuk membela nasib mereka yang dizalimi. Walaupun beliau tidak bertanding dalam PRU 1986, kepimpinannya tetap dihargai parti. Dalam Kongres DAP 1989, beliau dilantik menjadi anggota Jawatankuasa Tertinggi Pusat (CEC).

Bagi Bangsa Johor yang mengikuti perkembangan politik Ahmad Ton pasti

tahu beliau merupakan sosok yang komited dan pantang menyerah. Dalam PRU 1990, beliau bertanding melawan calon BN, iaitu Dr Ling Liang Sik yang merupakan Presiden MCA merangkap Menteri Pengangkutan di Parlimen Labis, walaupun tewas dengan 5,225 undi. Undi yang beliau perolehi adalah 12,485.

Dalam PRU 1995 pula, kerusi Labis masih menjadi taruhan DAP dengan sekali lagi meletakkan Ahmad Ton melawan Dr Ling sebagai penyandang. Namun, pertembungan tersebut tetap tidak memihak kepada DAP yang tewas dengan majoriti yang lebih besar kepada BN.

Meskipun tewas dalam beberapa pilihanraya yang dilaluinya, gerak kerja mengembangkan sayap parti tetap diteruskan. Pada 2004, beliau diberi amanah menggalas tanggungjawab yang lebih besar sebagai Pengerusi DAP Negeri Johor.

Dalam PRU 2004, DAP bertanding di enam daripada 26 kerusi Parlimen, dan 12 daripada 56 kerusi DUN. Ahmad Ton yang turut bertanding sekali lagi, tewas di DUN N.6 Bekok. Beliau mendapat 3,050 undi berbanding lawannya daripada BN yang memperolehi 9,521 undi.

Kesinambungan perjuangan

Kemasukan dan penerimaan muda mudi Melayu terhadap DAP adalah hasil perjuangan orang-orang lama yang tidak jemu berhujah. Dengan perkembangan teknologi maklumat, sebaran publisiti terhadap parti semakin mudah dan meluas.

Bagi Pak Ahmad, pencapaian ini amat-amat dibanggakan kerana kaum Melayu semakin berani menyatakan pendirian, terbuka dan memiliki kesedaran politik. Tiada yang lama, tiada yang baru-pepatah yang sering kita dengar menggambarkan betapa pentingnya penglibatan pemimpin-pemimpin terdahulu membangun dan mengukuhkan organisasi. Tidak terkecuali, beliau adalah salah seorang daripada mereka.

Beliau adalah tokoh yang perlu dijadikan contoh. Berpolitik bukan untuk jawatan, tetapi kerana kepuasan memberi khidmat, berkarya untuk masyarakat dan negara. Jasanya kepada parti dan perkembangan DAP di Johor perlu menjadi teladan dan dihargai.

FITNAH DAN UTUSAN, BAGAI ISI DENGAN KUKU

Oleh ZAIRIL KHIR JOHARI

Saya ingin merujuk kepada satu lagi siri fitnah oleh Utusan Malaysia pada 6 Disember 2016 yang jelas bertujuan untuk menggambarkan DAP dan Kerajaan Negeri Pulau Pinang sebagai ancaman kepada orang Melayu.

Kampung Mutiara

Salah satu tuduhan liar yang dilemparkan adalah bahawa Kerajaan Negeri Pulau Pinang lepas tangan terhadap isu Kampung Mutiara, Batu Ferringhi. Malah, Utusan Malaysia juga memfitnah Kerajaan Negeri Pulau Pinang akan merobohkan kampung tersebut.

Dakwaan jahat ini langsung tidak berdasar. Bagaimanakah Kerajaan Negeri boleh dikatakan lepas tangan apabila wakil-wakil rakyat Pakatan Harapan termasuk saya sendiri telah terlibat dalam usaha mempertahankan penduduk Kampung Mutiara daripada tindakan pengusiran yang dikenakan oleh mahkamah?

Pada masa yang sama, walaupun tanah tersebut merupakan tanah milik persendirian dan tuan tanah sudah pun memenangi kes di mahkamah, Ketua Menteri Pulau Pinang Lim Guan Eng tetap mengisyiharkan bahawa Kerajaan Negeri tidak akan meluluskan sebarang pemajuan di tanah tersebut selagi penduduk tidak diberi pampasan yang setimpal. Tambahan kepada itu, Kerajaan Negeri juga bersetuju menyediakan rumah PPR sebagai penginapan sementara seandainya berlaku perobohan rumah.

Usaha Kerajaan Negeri telah pun diiktiraf oleh Ketua UMNO Bukit Bendera Dato' Ahmad Ismail yang secara terbuka memuji sikap bekerjasama kepimpinan Kerajaan Negeri bagi memastikan kebijakan penduduk terpelihara. Adakah Dato' Ahmad Ismail akan turut difitnah oleh Utusan?

Dalam sebarang kes tuntutan tanah, Kerajaan Negeri Pulau Pinang senantiasa mengambil langkah proaktif untuk memastikan hak semua pihak terpelihara, khususnya penduduk yang terlibat. Hal ini juga dibuktikan di Tanjung Tokong, di mana kemelut puluhan tahun antara UDA dan penduduk kampung telah berjaya diselesaikan hasil daripada perbincangan bersama yang dimudahcarakan oleh Kerajaan Negeri.

Box Quote: Seperti biasa, DAP dijadikan momok untuk menakut-nakutkan orang Melayu. Namun UMNO harus ingat bahawa kini sudah hampir tahun 2017. Retorik perkauman apatah lagi fitnah memualkan begini tidak lagi termakan.

DAP tidak berminat dengan jawatan Perdana Menteri

Dalam keluaran yang sama, Utusan Malaysia turut mengulangi fitnah lama kononnya DAP akan merebut jawatan Perdana Menteri sekiranya menang bersama Pakatan Harapan. Meskipun tiada halangan dari segi Perlembagaan Persekutuan yang membenarkan



Seperti biasa, DAP dijadikan momok untuk menakut-nakutkan orang Melayu. Namun UMNO harus ingat bahawa kini sudah hampir tahun 2017. Retorik perkauman apatah lagi fitnah memualkan begini tidak lagi termakan.

mana-mana rakyat Malaysia untuk memegang jawatan tertinggi itu, namun DAP memahami fabrik sejarah dan sosio-politik negara kita dan adalah naif untuk DAP mengidamkan jawatan Perdana Menteri.

DAP tidak pernah berubah pendirian bahawa Perdana Menteri pilihan adalah Dato' Seri Anwar Ibrahim, bukan hanya kerana soal beliau Melayu, tetapi kerana beliau adalah Melayu yang berkelayakan. DAP juga percaya bahawa terdapat ramai pemimpin Melayu yang berkebolehan serta beramanah dalam kalangan parti-parti pembangkang yang sudah tentu tidak akan menyeleweng duit negara atau menerima 'derma' berbilion ringgit dalam akaun bank peribadi mereka.

Pada masa yang sama, DAP komited terhadap pembaharuan sistem dan bukan hanya mengejar jawatan-jawatan tertentu. Apa yang lebih bermanfaat kepada rakyat bukan sekadar penentuan Perdana Menteri tetapi reformasi keseluruhan struktur dan sistem politik negara kita yang telah nazak dirosakkan oleh rejim UMNO-BN.

Perlembagaan Persekutuan

Utusan Malaysia juga menuduh DAP tidak memartabatkan Perlembagaan Persekutuan. Tuduhan ini langsung

tidak masuk akal kerana sejak Merdeka hingga kini, Perlembagaan Persekutuan telah dipinda lebih 48 kali oleh kerajaan yang dipimpin UMNO.

Malah, menurut pakar perlembagaan, Prof Shad Saleem Faruqi, jika mengambil kira keseluruhan pindaan individu, maka Perlembagaan Persekutuan sebenarnya telah dipinda hampir 700 kali sehingga menjelaskan semangat asalnya. Sebagai bandingan, Perlembagaan Amerika hanya dipinda sebanyak 33 kali sejak tahun 1789.

Malah, DAP dan Pakatan Harapan yang memastikan Perlembagaan tidak lagi dipinda sewenang-wenangnya dengan manafikan majoriti dua pertiga kerajaan UMNO-BN di Parlimen sejak tahun 2008.

Secara dasarnya, DAP senantiasa berpegang kepada semangat Perlembagaan Persekutuan seperti mana terkandung dalam Pemasyhuran Kemerdekaan yang dibentangkan oleh Tunku Abdul Rahman Putra semasa Pengisytiharan Kemerdekaan pada 31 Ogos 1957, yang berbunyi:

"Dan bahwasanya kerana Perlembagaan Persekutuan yang tersebut itu, maka, ada disediakan syarat untuk menjaga keselamatan hak-hak dan keutamaan Duli-Duli Yang Maha Mulia Raja-Raja serta hak-hak asasi dan kebebasan sekalian rakyat

dan untuk memajukan Persekutuan Tanah Melayu dengan aman dan damai serta teratur sebagai sebuah kerajaan yang mempunyai Raja yang Berperlembagaan yang berdasarkan demokrasi cara Parlimen."

Pemasyhuran ini dengan jelas menekankan semangat dan nilai yang perlu dipelihara oleh Perlembagaan yang meliputi keselamatan hak dan keutamaan Raja-Raja Melayu, hak-hak asasi dan kebebasan rakyat, sistem Raja Berperlembagaan dan demokrasi berparlimen. Semua nilai-nilai ini digalas oleh DAP sepanjang kewujudan parti selama 50 tahun dan sebenarnya adalah UMNO yang meremehkan semangat asal Perlembagaan apabila bertindak meminda Perlembagaan bagi melemahkan kuasa institusi Parlimen dan Raja-raja.

UMNO terdesak

Jelas, fitnah dan Utusan Malaysia umpsama isi dengan kuku yang tidak terpisah. Akibat skandal-skandal rasuah yang besar serta kegagalan UMNO untuk mengurus ekonomi dan menangani masalah rakyat seperti kenaikan kos sara hidup yang makin ketara, maka terpaksalah mereka menggunakan media untuk memainkan sentimen perkauman yang lapuk.

Seperti biasa, DAP dijadikan momok untuk menakut-nakutkan orang Melayu. Namun UMNO harus ingat bahawa kini sudah hampir tahun 2017. Retorik perkauman apatah lagi fitnah memualkan begini tidak lagi termakan. Jangan hina kemampuan orang Melayu untuk menilai dan membezakan mana yang intan mana yang kaca.

*Zairil Khir Johari adalah Ahli Parlimen Bukit Bendera merangkap Penolong Setiausaha Publisiti Kebangsaan DAP

IMBAS KEMBALI 2016



9 Saman civil Jabatan Kehakiman Amerika Syarikat (DOJ) libatkan harta curi dari 1MDB menamakan 'Malaysian Official 1' sebagai salah seorang individu terlibat dalam menggelapkan dana berjumlah US\$1 bilion milik negara, dan disalurkan ke syarikat pembikin filem milik anak tiri Perdana Menteri Datuk Seri Najib Razak. Saman DOJ tersebut mendedahkan bagaimana dana 1MDB digunakan untuk membayar hutang judi Las Vegas dan membeli beberapa aset lain.



7 Pertemuan Mahathir-Anwar di kamar Mahkamah Tinggi Kuala Lumpur mencatat sejarah apabila kedua-dua seteru politik itu bertemu buat kali pertama setelah 18 tahun berlaga angin sejak Anwar dipecat daripada jawatan Timbalan Perdana Menteri pada 2 September 1998.



5 Jawatan Menteri Besar Kedah berganti tangan apabila Perdana Menteri bertindak menukar Datuk Seri Mukhriz Mahathir dengan Datuk Ahmad Bashah, setelah Mukhriz meletakkan jawatan apabila hilang sokongan majoriti DUN Negeri Kedah. Mukhriz kini menganggotai Parti Pribumi Bersatu Malaysia.

10 Bersih 5 berlangsung dengan jayanya pada 19 November dengan kebanjiran hampir 100,000 orang ramai dari Bangsar menuju Masjid Jamek Kuala Lumpur dan berakhir di perkarangan KLCC, meski Pengurus Bersih 2.0 Maria Chin ditahan di bawah SOSMA, manakala penggerak utama perhimpunan tersebut turut ditahan sehari sebelum perhimpunan berlangsung.



8 Deklarasi Rakyat ditandatangani oleh pemimpin-pemimpin utama Pakatan Harapan, termasuk Lim Kit Siang, Mohamad Sabu, Azmin Ali, serta pemimpin masyarakat civil bersama-sama bekas Perdana Menteri, Tun Dr Mahathir Mohamad.



6 Pilihanraya negeri Sarawak, dan pilihanraya kecil Sungai Besar serta Kuala Kangsar menyaksikan kekalahan Pakatan Harapan secara berturut-turut. Di Sarawak, Tan Sri Adenan Satem mengukuhkan kedudukan Barisan Nasional, walaupun bertindak menghalang pemimpin Pakatan Harapan masuk berkempen.



4 Presiden PAS Datuk Seri Haji Abdul Hadi Awang diberi peluang oleh kerajaan untuk membentangkan Rang Undang-undang Persendirian untuk memindah Akta 355, Akta Mahkamah Syariah (Bidang Kuasa Jenayah) yang dipercayai untuk membolehkan pelaksanaan hukuman hudud di Kelantan. Ahli Parlimen Marang itu bagaimana pun bertindak menangguhkan pembentangannya di kedua-dua peluang yang ada.



3 Parti baru Tun Dr Mahathir, Parti Pribumi Bersatu Malaysia (PPBM) bersetuju untuk turut sama memperjuangkan agenda reformasi, setelah tandatangani perjanjian kerjasama pilihanraya bersama Pakatan Harapan dalam rangka mengambil alih pentadbiran di Putrajaya menjelang Pilihanraya Umum ke-14 yang hampir tiba.



2 Lim Guan Eng dihadapkan ke Mahkamah Tinggi Pulau Pinang atas dakwaan melakukan rasuah melibatkan pembelian rumah keluarganya di bawah harga pasaran. Mahkamah telah menetapkan 34 hari untuk perbicaraan kes tersebut pada tahun ini.



1 Tun Dr Mahathir buat kejutan hadir ke Persidangan Kebangsaan DAP. "Pandangan saya tentang DAP dulu tidak betul" kata mantan Perdana Menteri itu. Mahathir turut memuji DAP yang disifatkannya sebagai lebih mempunyai sifat ke'Malaysia'an berbanding parti-parti komponen BN.

SIDANG EDITORIAL

**EDITOR • IZMIL AMRI
WARTAWAN • HAFIZ ZAINUDDIN
• FATIH HASSAN NORDIN
• SYAZANA HASANUDDIN
JURUGAMBAR • AHMAD YUSUF
GRAFIK • WAHYUDI YUNUS**